





省齋別稿目錄

卷第一

詩

題跋附

送陸先生赴春闈二首

余石月挽詩二首

挽許寺正二首

挽孟郡王兩首

挽張朝宗兩首

大行皇太后挽詞四首

跋平江蔣守帖

跋曾祖題名

跋陳丞相手書

卷第二

表

奏狀

奏劄

謝賜曆日表四首

賀重修皇太母回鑾事實表



賀太后慶八十表二首

賀皇太后牋二首 皇太后服藥赦書表二首

皇太后升遐慰表四首

慰冬至表三首 慰元正表

顯仁皇太后發引慰表兩首

殯宮禮畢慰表兩首

祔廟禮畢慰表兩首

賀冬至表 賀郊禮表兩首

謝郊赦表兩首 天申節賀表四首

謝御製御書損齋記表三首

廣德軍謝上表 謝除直秘閣知揚州表

信陽軍謝上表 謝除太府少卿表

張端明謝乞致仕不允表

漢州謝上表 江端明遺表

天申節進錄奏狀二首

大兄奏劄 王監簿辭召命狀

趙尚書論侍從隨赦加恩劄子

卷第三 青詞 功德疏 疏文

外舅設醮青詞 建康府為皇太后設醮青詞

茅山青詞 徐憲設醮青詞

金陵求雨青詞

方卿設醮青詞

郭元嘉設黃籙青醮詞

又設醮青詞

尚氏姊設醮青詞

十三弟設醮青詞

乾龍節功德疏八首

天申節功德疏八首

會慶節疏三首

皇太后服藥蔣山疏文

皇太后服藥赦書賽諸廟祝文

建康為皇太后舉哀疏文六首

請寶公祈雨疏文

祈雨雪文三首

卷第四 啟一

謝宰執啟

與江東張帥啟

徐憲頌德

周漕頌德

葉漕頌德

徐總領頌德

呂提舉頌德

臨安韓尚書啟

王舍人啟

湯中丞啟

凌正言啟

褚臺簿啟

宣州樓密啟

答陳國正啟

賀王侍郎啟

賀辛侍郎啟

賀万侯右相轉官加封邑啟

賀湯右相啟二首

賀沈左相轉官加封邑啟

問候沈左相啟 問候湯右相啟

賀王樞密啟 賀張尚書啟

賀朱中丞啟 問候葛侍郎啟

賀何大諫啟 賀都司諫啟

謝執政啟

卷第五 啟二

賀李漕啟 賀江東陳憲啟

賀王樞密啟 回陳都官啟

賀陳同知除知院啟

賀宣州魏叅政啟 賀鎮江董知府啟

賀田開府啟 回紫叅議啟

回吳漕啟 賀江東王提舉啟

賀吳漕啟 回淮東朱總領啟

賀賀叅政啟二首 賀湯丞相遷左丞相啟二首

賀陳右相啟二首 謝執政啟

賀湯右相轉官加恩啟二首

賀孟宗丞除江東運判啟

賀王同知啟 賀楊給事啟

賀孫侍郎啟

卷第六 啟三

賀陳知院啟

賀楊少師啟

賀趙侍郎啟

賀魏宣州啟

賀湯侍郎改除戶部啟

賀葉侍郎啟

賀賀尚書啟

賀周侍郎啟

賀洪舍人啟

謝執政啟

謝賀尚書啟

葉侍郎啟

沈侍郎頌德

趙侍郎頌德

揚侍郎頌德

黃侍郎頌德

王侍郎頌德

周給事啟

洪舍人啟

張舍人頌德

朱侍御啟

任殿院頌德

汪察院啟

任察院頌德

何司諫頌德

都正言頌德

賀鎮江鄭直閣啟

賀辛福州啟

賀閩中周提舉啟

賀閩漕王敷文啟

卷第七 啟四

上湯丞相求嶽祠啟

得嶽祠謝宰相啟

賀葉樞密啟

賀樞密啟

回宣州朱舍人啟

賀周給事中啟 賀岳都統起復啟二首

賀周侍郎啟二首 賀曾侍郎啟二首

賀謝提舉啟二首 謝舉自代啟

賀邵侍郎啟 回王運幹啟

與新總領啟 賀孟少師判平江府啟

回交代除即官啟 回教授啟

賀周內翰啟二首 賀張舍人啟二首

卷第八 啟五

賀黃舍人啟 賀任秘監啟

賀殿院啟二首 賀葉侍郎啟

賀揚侍啟 上沈丞相啟

賀金陵韓信師啟 賀徐信州啟二首

賀董侍郎啟 漢州謝到任啟

賀揚州劉安撫啟 賀揚尚書啟

賀洪侍郎啟 宋侍郎啟

邵侍郎啟 王給事啟

沈正言啟 謝安人酒官啟

與恩平郡王啟 謝解啟

卷第九 書小簡 親書 樂語

上陳丞相書 又上朱叅政書

謝執政小簡

回江東王運小簡

妻妹親書

向完親書

小一姪納幣胡氏親書

十二弟韓氏納幣親書

江權卿親書

趙慰親書

王蘊親書

廣德軍鹿鳴燕樂語

請廬帥樂語

卷第十 墓誌銘

祭文 祝文

左朝請大夫王公葆墓誌銘

文山人墓誌銘

祭徐淑人文二首

祭岳都統母夫人文二首

七兄親迎歸祝文

伯考伯母加贈祝文

省齋別稿目錄 畢

省齋別稿卷第一

周益文忠公集八十一

詩題跋附 並代作

送陸先生府赴春闈

代十弟
紹興辛酉

九重詔下選賢能
又見先生啟遠行
離恨暗隨流水去
朔風穩送片帆輕
休嗟此日睽違事
預發來春晉錫榮
一去鵬程應九萬
始知佳夢合金精

同前 代李及之

何幸天涯款緒餘
軒昂氣槩識雄圖
滔：腹稿盈千軸
凜：詞鋒敵萬夫
方對芝眉蒙教載
乍驚絳帳失規模
從茲穩步青雲上
始信沙堤夢不誣

余石月挽詞 甲戌

學重今顏子年高漢伏生鯉庭傳道德鱣序列公卿忠
孝平生事詩書後世名於公無一憾多士自傷情
自我居洪府從公父子遊至言今在耳往事忍回頭風
急唐山壑雲埋石月樓生芻無路奠灑淚寄東流

泰州守許寺正輓詞二首 代外舅

昔在西京日名臣數次公人歌廷尉德帝念潁川功出
處君何異修良譽亦同誰提班固筆千古紹高風
身襲黃門慶腰懸紫綬龜未登知命歲遽逼蓋棺期風
咽哀茹恨雲凝斷壘悲只應潘岳淚重憶悼亡時

孟郡王忠厚輓詞二首 丁丑

炳靈崧嶽古諸姜令德高標對寵光位冠西樞籌運幄
班高左棘繡為裳丁年聲譽佳公子二紀功名異姓王
人物風流今已矣空令吳越詠甘棠
祥源總使奉真遊藏室提綱接勝流書蠹只知三館樂
盤鯖不闕五侯羞名山早晚尋黃石逝水須臾失夜舟
白馬素車分散後何人更忍過西州

張朝宗挽詞二首 代外舅 丁丑

耆舊推西洛於公見典刑全名高白壁利刃拂青萍日
者瞻卿月天乎隕使星平生精藻鑿桃李半槐庭

甲第開鄰里蝸廬遂不孤相從期晚歲太息奠生芻涼
吹飛丹旆殘陽詠白駒傷心松柏路螭首載龜趺

大行皇太后挽詞二首 代方總領己卯

瑞應興沙麓祥源發豨韋東朝方母育滄海倏塵飛蟾
暗冰輪影鼇翻地軸機宸心懷慕處篋有五時衣
媯泐芳聲遠思齊聖德優相妃初從舜文母晚興周養
棄慈寧樂神同永祐遊鳳車青羽蓋忍望浙江舟

同前

得道西王母思齊古太任僊遊歸少廣人世失徽音閨
苑桃空熟稽山栢自森天心知舜孝寒日慘多陰

憶昨登中壽梅觴慶九重春回方晝永月掩遽雲濃鍾
鼓沉長樂蚕桑罷濯龍宣仁遺懿在定謚獨追蹤

題跋

跋平江蔣守帖 代程崑山沂

璩守郡朝夕勉竭但老朽無補事功今歲必謂境
內登稔秋稅不勞而辦乃承垂諭如此聞名然
農夫辛勤不得厚獲其轉徙固宜切望恣意拊集
諭瀕臨江海細民許其就便送納粳米庶免般運
勞費俾之少安則郡縣之本也左右勤民如此安
得不如來命公檄未到間一切曉示使之通知為

佳諸邑赴府倉者亦不令多有費用滯留區：之心惟欲利民耳

右手書二通太守蔣公諭屬令以勤民之指也公繇天子侍臣來鎮輔藩惠足以存下明足以恤隱故雖尺牘而周悉勤懇如此昔韓愈有言賦有常而民產無常水旱癘疫之不期民之豐約繫於州縣：令不以言連帥不以信民就窮而斂愈急嗚呼使唐之守帥能以公之心為心則愈言何自而發哉公之筆精墨妙獨步當世人得半稿自應藏去以為榮况夫利民之心昭然在是沂也何敢獨拜嘉命而私諸篋衍乎固宜治金伐石揭

示百里俾為吏者目擊而戒追呼之擾為民者戶知而殫樂輸之誠一舉而二美具焉蓋公之賜也沂之幸也
紹興二十七年十一月日

跋曾祖題名 代吳司戶裒

政和三年癸巳閏四月甲午朝拜茅山景福萬年殿遂行告遷奉安之禮遵上旨也已未還府家弟樽男敬激檄來迓於此知府事建安縣子吳拭題曾大父昔持從橐鎮金陵距今四十六年中經搶攘山川良是城郭非矣去府二十有五里寺曰祈澤如魯之靈光巋然獨存曾大父題名在焉裒來主辭曹恭覽涕

下飭匠摹寫鏡諸樂石豈惟紆念祖追遠之心亦使父老過之對甘棠而思召伯讀岷碑而泣羊公也紹興戊寅五月庚申

跋陳丞相手書 代世九舅

高文大冊屬意而為則其詞章黼黻筆墨精妙理亦宜之若乃書疏填委引紙占答此豈有意於其間哉特以溫厚之性根於中故雖造次皆樂善之言心畫之妙應於手故雖遊戲皆絕人之藝昔漢嘉威侯瞻辭善書數百封親疏各有意人得尺牘皆藏去以為榮丞相益其苗裔與何道大德全而餘力猶至於斯也某寶此十餘

年矣我公方運造化以鑪錘一世如某盤跚闔茸仕愈久而身益困視鞭景而弗悟委衮褒於草莽凡前日拜賜之榮祇所以為今日之愧與年月日

省齋別稿卷第一 終

省齋別稿卷第二

周益文忠公集八十二

表

奏狀

奏劄

申省狀附並代作

謝賜曆日表

紹興十八年

代辰州作

欽宗天道初觀玉曆之成謹授人時均下璽書之賜仰
 祇德意俯佩恩榮 中謝恭惟皇帝陛下輔相兩儀總齊
 七政大法協於五紀克叙彝倫閏月定乎四時靡乖躔
 次推本聖心之自益先民事之宜故此遐方亦頌密度
 臣敢不深思奉順務稱嚴恭東作西成行見京坻之積
 南洽北暢豈惟正朔之同

同前

紹興二十七年

代外舅廣德軍作

欽崇天道課玉曆於清臺謹授人時下璽書於方國凡
任承流之責舉深拜賜之榮中謝恭惟皇帝陛下功錫
禹疇德齊舜政炎圖載赫既聰明睿智以有臨皇極用
成宜歲月日時之無易申命居卿之職載嚴頒朔之文
天始地終得大衍自然之數珠連璧合驗太初最密之
祥誕告多方用興嗣歲臣敢不仰推聖意徧諭封圻九
叙惟歌使咸知於帝力三時不害期各厚於民生

同前 紹興二十九年

日官推數當五年再閏之期王者頒常下三統四分之
曆凡叨守土敢忘承流中謝恭惟皇帝陛下把握陰陽

彌綸天地授泰元之神筭協洪範之彝倫水火金木惟
修坐致九功之叙歲月日時無易預知百穀之成爰即
上春徧頒密度豈特新又新而無弊蓋將朔復朔以何
窮臣一分銅虎之權三拜璽書之賜年運而往竊自驚
齒髮之哀民愚而神願謹示農桑之候

同前 紹興三十年

參萬歲以成統方衍無疆之數以四時而為柄用頒有
截之區望雲祇拜於君思愛日益勤於吏事中謝恭惟
皇帝陛下德隆廣運化本密庸仰膺申命之休俯謹授
時之政地法天而天法道據四大以宅中正次王而王

次春殖萬民而布治况歲直金穰之次而曆符璧合之
祥農力穡以無違吏窺文而竊拊臣敢不勤敷聖意徧
諭部封時和年豐頌已示夢魚之兆家給人足愧莫施
流馬之功

賀重修皇太后回鑾事實表

紹興二十六年代
外舅廣德軍作

冬溫夏清久承長樂之顏文瞻事詳今紀蘭臺之筆母
儀既著聖治愈光中賀臣聞周美太任詩人發詠漢迎
薄后史氏特書儻汗青不載於一時則副墨孰傳於萬
世於皇盛舉克掩前芳恭惟皇帝陛下仁冒華夷孝通
天地締盟北道永清萬馬之屯致養東朝夙返六駝之

馭言念皇家之殊慶豈容悖史之闕文既詔諸儒纂事
而書之策復資上宰帥屬而獻于王昭哉典籍之精詳
導以禮儀之繁縟風傳六服喜動群工臣身也滯南心
焉拱北班香宋豔莫窺三館之藏舜日堯年願祝兩宮
之壽

賀皇太后慶八十表

紹興二十九年

東朝衍慶方膺難老之祥南面稱觴適及常珍之日禮
行正旦喜浹綿區中賀恭惟皇帝陛下道貫神明仁漸
動植乂躋民於化國每養志於慈寧億載萬年人頌唐
宗之孝四章一節歲踰漢曆之元當熙春肇始之時舉

邃古未行之典動鼓鐘於長樂聲氣咸和滿環珮於後
宮儀容大備豈特親其親而廣九重之愛又將老吾老
以來萬宇之懽臣屬守近藩莫趨適列思齊所以聖佇
觀則百之男天保莫不增更祝無疆之壽

同前

德盛母儀方茂松椿之壽誠殫子道遂稱椒栢之觴禮
容肇講於宮庭德教遠加於海宇中賀恭惟皇帝陛下
仁先廣愛志務寧親以綉裳畫衮而為戲彩之榮以芳
膳蘭飧而備常珍之奉繇上帝眷一人之孝致慈闈開
萬歲之期乃稽興慶之舊儀兼舉建隆之故事受茲介

福於王母豈惟並擁於休祥建其有極錫厥兆民蓋亦
咸躋於仁壽臣謨持龍節莫違鶴班則百斯男願嗣文
母之徽音之雅既多受祉載賡魯侯宴喜之詩

賀皇太后牋

慈闈就養春秋宜過于八千寶曆更端甲子將周于五
百舉慶儀于內殿溢和氣于外庭中賀恭惟皇太后殿
下沙麓儲精塗山啟瑞誕育聖神之主茂揚慈儉之風
鍊石而補皇天不愧女媧之巧得道而坐少廣莫知王
母之年稜容爰講于三朝純孝益隆于萬乘國家賴慶
簡冊增光臣適綰郡符阻瞻禁幄橐弓戢天早知武王

十亂之功含飴弄孫行應堯帝多男之祝

同前

七紀垂周得金母長生之道九重致喜講玉卮為壽之儀兆和氣于芳春騰懽聲于華夏中賀恭惟皇太后殿下篤生上聖密贊中興好黃老之言何慚漢后茂姜任之德克紹周京筭延南極以無疆福脩東朝而未艾爰因歲旦肇舉禮文奉萬歲之觴共知天子之孝極九州之養永居帝母之尊臣將命和門傾心盛典融：洩：豈資潁谷之封人怡：愉：請頌元和之聖德

皇太后服藥赦書表

孝死大於寧親方謹寢門之間仁莫先於赦過肆空宇戶之因伏聽詔音灼知聖意中謝恭惟皇帝陛下勤修子道祇奉母慈散和氣於綿區無幽不被洽善祥於長樂何恙弗除豈資藥石之功自得天人之助臣猥塵遠使獲奉寬條動植被虞帝之恩既隆孝治燕喜壽魯君之母願繼頌聲

同前

問安侍膳躬定省于九重解媯除苛洽寬仁於四表堯言誕布舜德益昭中謝恭惟皇帝陛下孝通神明仁浹黎庶介祉欲臻於文母施恩爰暨於周民事親足以解

憂天心所相勿藥至於有喜坤德自寧臣猥使近畿祇
承溫詔祝三面之網已騰樂國之歡呼奉萬年之觴即
慶慈寧之康復

皇太后升遐慰表 紹興二十九年

慈闈晝掩哀訃夕傳凡思持載之功舉抱摧傷之痛中
慰恭惟皇帝陛下事親盡禮侍膳殫誠久承文母之顏
徽音遽隔遠邁顯宗之孝追慕何窮願寬陟此之悲少
副普天之望

同前

駟馭上賓終天莫返駒懷永慕履地所同 中慰恭惟皇

帝陛下德邁舜文行逾魯閔幾年膝下親承壽母之顏
一日宮中頓失慈寧之養雖聖孝深思於載育而民心
咸懼於過憂願抑至情俯安羣下

同前

母儀久正坤載俄隳凡在含生舉懷悲慕 中慰恭惟皇
帝陛下仁先立愛志務寧親侍膳問安備殫誠意省刑
薄斂式慰母心豈期天命之難謀終歎慈闈之遽掩雖
一人之孝方永念於劬勞然萬務之繁當深思於節抑

同前

釁結東朝悲纏中夏遙知晬穆正切哀恫 中慰恭惟皇

帝陛下性本自天行皆高世漢文至孝晨昏無解帶之
安虞舜好生遠通釋畫冠之禁既勤施德謂可寧親修
聞厚地之傾莫曉彼蒼之意願思適變毋致過哀上以
符慈寧治命之言下以副黎庶誠心之懇

慰冬表

紹興二十九年代江東漕司

化國日舒徐行北陸聖人孝至永念東朝凡在輿情同
深孺慕中謝恭惟皇帝陛下德隆天性報厚毋慈當宮
線之初添帳禕衣之浸遠率百官而為壽思虛興慶之
彝儀幸舊宅而會冬益愴永平之故事願抑對時之感
俯安率土之心

同前

望雲氣於觀臺甫驗新陽之至斷鐘聲於長樂莫陳亞
歲之儀上切哀恫下均感慕中謝恭惟皇帝陛下行高
文帝孝邁有虞誦凱風聖善之詩悵六駝之永隔當化
日舒長之候視一線以增悲仰祈宸抱之少寬式對天
心之來復

同前代方總領

亞歲甫臨方講漢儀之舊徽音浸遠共深文母之思遙
知睟穆之光正切哀恫之慕中謝恭惟皇帝陛下道同
堯舜行過參騫罷長樂之壽觴深悲節物望慈寧之總

帳益動孝思願寬追遠之懷茂對履長之序

慰元正表 紹興三十年 代方卿

行夏時而正曆荐易歲華履春露以念親益昭聖德凡
預載持之數共懷怵惕之思中謝恭惟皇帝陛下以大
孝而顯揚任姒之徽音以至尊而度越參騫之高行當
萬國貢珍之在列嘆東朝靈几之方新珮響唐宮莫展
壽觴之禮鐘鳴漢殿暫停元會之儀願寬追遠之心茂
對履端之序臣猥將使指不獲躬詣東上閤門臣無任

顯仁皇太后發引慰表 代方總領

陟彼祀兮爰卜青烏之吉維其時矣遽瞻畫翼之行祖

載逶迤聖情惻楚中謝恭惟皇帝陛下德鍾天性道冠
人倫粵符素柰之謠彌切蓼莪之感親喪固所自盡也
內不廢於三年聖德又何加孝乎外已刑于四海逮茲
遣奠尤極哀悰顧淑寧已隔於東朝惟追慕少寬於南
面

同前

龜猶告吉翟駕即塗念慈矩之長違知聖情之永慕中
謝恭惟皇帝陛下高行超於今古純誠貫於神明自罹
文母之哀益顯有虞之孝送終盡禮遣奠及期瞻披綵
之在庭宜栝捲之增感願副群生之望少寬罔極之懷

殯宮禮畢慰表 代方總領

駟馭上賓武帳久虛於長樂龜猶未諗容衣遂閱於稽
山一人嗟慈範之違萬國嘆坤儀之遠 中謝恭惟皇帝
陛下純誠冠古至行積中慕親之心未常息焉報喪之
禮可謂盡矣神靈為之顯相天日至於晏溫用葛無麻
蓋異魯君之母因山配地實同唐室之規仙寢既成真
遊莫返追懷聖善固益動於孝心俯為邦家當勉裁於
哀慕

同前

日月有期爰畢因山之制寢園在望共勤陟屺之瞻追

懷太妣之徽音益惻武王之達孝 中謝恭惟皇帝陛下
德隆天性念極母儀既哀戚之內深亦禮文之外盡為
之宅兆奉長樂之禕衣見于著龜祔祐陵之吉壤逮茲
甫窆孰不纏悲雖上聖熒痛長違於慈矩然下民懇
懇願勉抑於至情

祔廟禮畢慰表 代方總領

設祭以虞少駐言歸之馭祔姑而祀永綏如在之靈適
觀彝典之成彌顯聖人之孝 中謝恭惟皇帝陛下行為
世法性本生知宅憂每越於常情制禮率遵於故事瞻
文王之清廟久矣寧神頌太妣之徽音茲為登配既送

終之無憾在追遠以宜寬臣限以職守所拘不獲躬詣
闕庭臣無任

同前

縻主來歸 講九虞之祭椒塗永闕遂參諸后之游悲
動紫宸禮嚴清廟 中謝恭惟皇帝陛下誠通幽顯道法
祖宗問寢承顏事母昔同於事地慎終追遠寧親今至
於寧神雖云彛制之遵時乃明王之孝閔宮有恤已聞
升祔於姜嫄南面何為願節哀恫於虞舜

賀冬至表

紹興三十年

曆紀清臺甫驗周正之應人安化國共欣堯日之長惟

時神聖之君坐獲天人之助 中賀恭惟皇帝陛下德參
覆載明並照臨道方慶於陽來福自隨於剛長不假會
八能之士和氣已充無煩觀五色之雲豐年可卜臣幸
逢至景阻望威顏但同江表之民遙致華封之祝

賀郊禮表

紹興二十八年

萬乘遙驅臨竹宮而齋祓一陽來復舉柴燎以精禋熙
事告成綿區賴慶 中賀臣伏以百神咸秩雖歷代之通
規三歲親祠實本朝之定制既嚴恭之曲盡亦疏教之
適宜自非明德之馨孰備聖人之饗恭惟皇帝陛下道
膺多助運際中興天為益而地為輿爰講合祛之禮祖

有功而宗有德聿遵並侑之文遵豆靜嘉璧琮華潤既
神靈之底豫宜華夏之同歡臣耳屬上儀身縻近甸漢
壇八陛莫陪績佩之趨舜樂九成徒夢鈞天之奏

同前

稽國舊章修時大祀神靈底豫華夏騰歡中賀臣伏以
天施地生非合祭無以答兩儀之况祖功宗德非陟配
無以揚列聖之休厥際昌辰乃成熙事恭惟皇帝陛下
禮隆報本孝極奉先乘至景於一陽講親祠於三歲歷
太宮而裸鬯即吉土以欽柴峨峨奉璋來顯相之多士
洋洋盈耳脩克諧之八音恍雲車風馬之臨燦壁月珠

星之應一人有慶萬福來同臣身也滯南心焉拱北從
甘泉之法駕莫預駿奔受宣室之神釐徒勤注想

謝如赦表

竣事圓立施恩方國繚綸一出縲紲四空中謝恭惟皇
帝陛下祇紹燕謀茂昭鴻化仁同覆載每去殺而好生
法若江河常易避而難犯尚虞黔首或麗丹書饗帝于
郊俾緝熙于純嘏配天其澤用敷錫於庶民仰瞻貫索
之星沉俯驗圜扉之草茂臣敢不勤宣漢詔徧諭周邦
二千石之惟良雖有慚于共理四十年之不式幸永覲
於措刑

同前

輦回泰峙慶熙事之備成幄次端闈錫湛恩之汪濊星
 馳紫詔冰釋畫冠中謝恭惟皇帝陛下禮重宗祈德隆
 丕冒除漢家之祕祝惟欲惠民監周室之祥刑每思慎
 罰茲侈三靈之况畫捐五過之疵轉和氣於春臺躋嘉
 師於壽域臣適持龍節莫望鷄竿神祇祖考之咸安乂
 知舜孝輝翟胞閭之有畀願廣堯仁

天申節賀表

紹興二十八年

帝立子以生商時適中於九夏民同心而戴舜節共紀
 於千秋中賀恭惟皇帝陛下剛健乘乾聰明稽古平徭

薄賦散和氣於豐年耀德銷兵躋嘉師於壽域眷此長
 羸之月薰然長育之風喜動東朝尚記日符之夢懽均
 北道有來星使之車既深恩丕冒於華戎宜善頌悉祈
 於富壽天心所鑒人欲必從臣濫綴從班欣逢聖旦方
 千里者九適備敷於藩維呼萬歲者三第馳誠於軒陛

同前

日形漢夢紀誕節於九重風入舜絃扇歡聲於萬國中
 賀恭惟皇帝陛下乾坤合德曆數在躬儉勤遠法於祖
 宗慈愛薰懷於夷夏人之所助天且弗違福祿延洪永
 御赫炎之祚本支蕃衍更觀振蟄之祥臣名

在周行身遠魏闕制三十年之國用方儲細柳之糧上
千萬歲之壽觴徒想猗蘭之會

同前代總領

蒼龍正于南方適當盛夏紫電飛於北斗丕顯昌期慶
屬當陽歡均率土中賀恭惟皇帝陛下穆清居位濬哲
在躬以安平之世而益務持盈以富足之秋而常思寶
儉爰應朱明之序系隆火德之基八千歲之春秋方衍
無疆之筭數百所之符瑞更儲有羨之休臣分職近畿
馳心廣陸作誕聖繼天之樂竊自愧于唐臣歌阜財解
慍之風茅欣逢于舜日

同前

天生民而立之君茂啟中興之運臣歸美以報其上共
忻載夙之期中賀恭惟皇帝陛下配德乾坤合明日月
御赫：炎：之祚成巍：蕩：之功當樞電之呈祥舉
華戎而賴慶嚴恭寅畏而自度已迪哲於四人虛靜恬
淡而無為方成純於萬歲臣猥司外閫阻造近班使壽
使富而多男願上堯封之祝宜民宜人而受祿載賡周
雅之章

謝御製書損齋記表

紹興二十九年
代江東帥司

君子懲忿窒慾寓妙理於齋居聖人肆筆成書錫宸章

于蕃服望雲天而祇拜偕民吏以榮觀中謝臣伏以自
 昔守成之君鮮知持滿之戒雕墻峻宇茅營桂館以求
 僊繪句締章或侈拓梁而流詠既不聞於修德自有愧
 於作猷豈如上聖之資懋啟中興之運念宴遊之不急
 有感於斯惟筆硯之未忘式稽于訓乃闕殿廡之側益
 窮聖學之高究六十四卦之盈虛獨取名於抑損述二
 百餘言之謨訓思坐鑒於興衰爛奎壁之光輝得乾坤
 之簡易恭惟皇帝陛下道包衆甫德冠百王克勤於邦
 而克儉于家因遊於逸而因淫于樂爰以躬行之美形
 諸心畫之精命自郵傳人皆草偃臣敢不仰遵彛教俯

迪群黎煥乎文章既睹神馬圖書之祕注其耳目共化
 羔羊節儉之風

同前代方總領

超然燕處損又損以標名倬彼雲章休勿休而示訓啟
 寶函而拜賜拭凡目以知榮中謝臣伏以真宗著清景
 之題必言省費仁祖述危竿之諭益慎居高是皆重熙
 累洽之時不廢履薄臨深之戒於皇上聖克紹先猷知
 盈滿之當持念宴遊之不急乃闕殿廡之邃載摘睿藻
 之華探伏羲西伯之用心既窮大象監武帝明皇之失
 策用作元龜乃如八法之通神尤見一人之能事恭惟

皇帝陛下簡易合乎天地儉勤御于家邦蕩：業：已
底日新之盛兢：業：不忘夕惕之思雖精微自得於
宸心而播告未周於邦域用鈇樂石徧錫官聯臣敢不
三復聖人之言載殫愚者之慮朝夕清燕以自警既存
乎辭損益盈虛與偕行願事斯語

同前代吳漕

殿廬闢室揭先難後易之名睿藻摘詞述據舊鑒新之
旨刻堅珉於天上錫副墨于人間中謝臣聞山不自高
乃成九仞澤惟善下斯會衆流因二象之能謙畫六爻
而為損仲尼讀易深虞持滿而自賢陸贄抗言力論裕

人而約已未有據域中之大寶立天下之廣居即蠅蝻
蟻獲之宮制為璇擗著潔靜精微之語親御寶跗究日
月之虧盈體乾坤之簡易內頒百執外及多方聖謨雲
漢之昭回妙墨龍鸞之蟠翥恭惟皇帝陛下持盈有道
守位惟仁以清心寡欲為先以黷武窮兵為戒捨宮寢
而即大庭之館得黃帝之齋心衣弋綈而罷百金之臺
邁漢文之躬儉尚慮蒞官之衆未知懲忿之方爰出宸
文俾享帝德臣敢不服膺大訓竭節外臺韋三絕以深
思誦之無數龜十朋而自效奉以有為

廣德軍謝上表

紹興二十六年代外舅

睿主有為慎求良守微臣何取誤列附庸懷印紱以知
慚望雲天而叙感中謝伏念臣奮身孤遠逢世休明趨
事赴功嘗抱區區之志循名責實迄無赫赫之稱方謀
三逕之歸遽忝一麾之眷言桐水密拱楓宸任德去
刑吏識朝廷之意平徭簡賦人安田畝之生初莫布於
教條但坐縻於廩稍茲蓋伏遇皇帝陛下乾剛用九皇
質登三如日正中畢照百工之能否與天同大常憂一
物之棄遺遂使至愚亦叨共理臣敢不勉圖實効深念
空餐政拙催科儻繼陽城之下考民無愁恨庶禋宣帝
之中興

謝除直秘閣知揚州表

紹興二十九年九月

劇部觀風已冒外臺之寵通都移牧更聯中秘之華朝
違舊治之山川夕見新封之民吏仰宣德意俯佩恩榮
中謝伏念臣性拙以迂器凡而近先朝賜第早被於作
成上聖掄材嘗塵于任使自終更于安陸旋退屏於闕
限筋力久衰幾坐消于駢肉星霜十易每竊歎于鬢絲
暨逢公道之宏開獲與時髦而並驚分符攜李深慚芻
狗之重陳換節江圻粗試鉛刀之一割方虞簿責遽奉
詔除矧是廣陵夙稱督府北隣修睦邊城無晝閑之驚
南畝服勤田畯有秋成之喜欲敷靜治宜擇能臣不圖

猥擢於庸才仍復就如於美職江通一水誰云淮海之
遙名列三山頓覺瀛洲之近叨踰甚矣報稱謂何此蓋
伏遇皇帝陛下堯哲知人湯寬御衆察臣習於吏事故
付之綏撫之權憐臣奮自書生故寓以清華之直龍光
所被駕鈍奚堪臣敢不上體眷知勉殫夙夜身雖制閫
莫陪東觀之諸儒志則勤民庶効西京之循吏

信陽軍謝上表 紹興二十九年

畿西假守僅輸乘障之勞湖外分麾復預專城之數洗
印章而視事望旒冕以知恩中謝伏念臣瓠落凡材榆
檜微分三紀官塗之荏苒十年幕府之棲遲浙水江圻

早安平進岷山粵嶺中事遐征備半刺于岷南列附庸
於塞上試可乃已終更亟還偶逃虞典之黜幽荐冒漢
庭之宣化惟義陽之偏壘乃申伯之舊封土厚人淳昔
蓋稱于衍沃兵銷賦簡今漸復於流移豈伊庸瑣之資
堪此撫摩之任茲蓋伏遇皇帝陛下深仁懷遠大智燭
微每求師帥之官尤慎邊疆之吏俯嘉勤拙俾効疲駕
臣敢不悉力安民盡心固圉周邦咸喜雖慚吉甫之詩
共理惟良願廣孝宣之治

謝除太府少卿表

將命江淮夕塵星省疏榮觀闕驟亞月卿念委寄之不

移知恩私之愈厚中謝伏念臣寒鄉晚出薄宦早飛叨
逢顯俊之秋濫綴登畿之數專負丞于外府旋列屬于
中臺所懼汰歸乃膺臨遣給餉坐兼於兩路空餐行及
于再暮自量心計之非長常恐使華之不稱竊思載籍
具有前模流馬木牛葛亮創蜀中之運輦車驪駕寇恂
資河內之軍彼皆值于行師尚不聞于乏事矧說劍橐
弓之後無飛芻輓粟之勤茅鈎考于簿書粗幹旋于金
穀論功何有竊位則多已慚假寵于諸郎更許叅華于
七寺中負梁鶴之刺徒驚晉馬之蕃此蓋伏遇皇帝陛
下大智博臨深仁徧覆灼知能否故雖遠而不違遠力勸

事功凡有長而必錄爰茂出綸之渥悉褒總賦之臣遂
致下愚亦升少列臣敢不仰承睿眷俯竭駑才無廢前
勞少助補足食足兵之政更圖後效永肩堅惟忠惟孝之心

張端明謝乞致仕降第二詔不允仍赴行在奏

事表 紹興二十九年五月

需章屢貢祈必返于田廬温詔荐頒俾趣朝于觀闕仰
洪私之曲被嗟素願之靡伸詞窮幾至于忘言感極惟
知於賈渚中謝伏念臣以柔榆之暮景司管籥之重權
引分丐歸殆非一日強顏冒寵坐閱三年隕越是虞哀
殘益甚矧父書之將墜在私義以何安竊慕馬遷請論

先人之所次庶幾延壽追終舊事之未成用控忱辭疊
塵淵聽敢謂愈音之閱更叨召節之嚴欲偃倮而趨則
昧垂車之志將逡巡以避又貽侯駕之誅進退不遑凌
兢失措此蓋伏遇皇帝陛下恩深念舊禮厚馭臣謂其
事奉有年早陪簪橐憐其餘生無幾久去軒墀既未許
于歸休乃特容于入覲臣敢不勉承訓諭上體眷知葵
藿之心儻一傾于天日龜魚之性即自樂於江湖豈惟
不食於前言抑亦粗成于先志

漢州謝上表

紹興三十年

觀闕九重榮頒印組舟車萬里來見吏民所慚庸陋之

資莫稱蕃宣之寄

中謝伏念

臣才不足以應務學不足以

通經自竊儒科即從吏役臨事欲殫於尺寸程能奚補

於絲毫方伏窮閭遽塵偏壘矧德陽之粵壤為益部之

樂郊去國雖遙望雲不隔聖主寬仁之有素惟在布宣

朝家法令之具存茅當遵奉名叨分土實愧空餐此蓋

伏遇皇帝陛下大智燭微深恩被物獎擢循良之吏撫

綏幽遠之區謂臣早奮羈單知人疾苦察臣粗更中外

體上焦勞用錫左符俾臨右蜀臣敢不勸農桑以敦其

本省刑罰以樂其生姑云職業之常尚容自勉倘論乾

坤之造夫豈能酬

汪端明遺表

陰陽之數難逃要歸有盡覆載之恩未報寧忍無言指
 下地以將終望高穹而永嘆中謝伏念臣奮身寒遠稟
 質迂愚魯微一善之瘡人誤辱兩朝之過聽六卿分職
 佐銓曹版部之劇繁十國為連叨閩嶠坤維之鎮撫晚
 由禁路洊領輔藩以疾求閒竊真祠之三命何功受寵
 聯祕殿者六年宜其福過以災生致乃神殫而氣索遂
 辜洪造永謝清時伏願皇帝陛下剛健天行光明日就
 萬年億載長承太上之顏四海九州迄觀丕平之世臣
 生而無益死亦奚為駕蹇自慚向有埋帷之累精誠未

泯豈忘填海之心

奏狀

天申節進銀一千五百兩奏狀二首紹興二十八年

代江東轉運司

漢嶽呼三夙應社鳴之旦周庭旅百載修寶贄之儀前三字

件物作注剛本乾為瑞繇山溢恭輸內府庶參九牧之金顏

詔尚方助鑄千秋之鑑

盛德在火命自天申珍物為金寶難地愛言念逢辰之

載夙宜修享上之多儀前件物瑞溢商山名參漢幣雖

睿哲以不貪為寶豈貨賄之敢供然臣民堅請祝之誠

假猜剛而自見

奏劄

大兄奏劄 淳熙三年

臣竊見朝廷向來將福建沿海人戶舟舡籍定數目分作甲乙丙三番輪流差使其當番之人前半年告報不
 得出外行之既久公私按堵未嘗乏事淳熙元年樞密
 院差黃蜚英同逐州通判再行根括立賞糾告監勒打
 駕伺候檢量丈尺辨驗木植之新舊雕刻帆橈櫓置備軍
 器楨具拘留坐泥近下半年妨廢輿販中下之家往
 往失業既得放散方且營運曾未半年忽準指揮三番

併發赴平江府許浦擺泊事出倉卒州縣奉行急於星
 火期限迫促而海道風波無期程追逮家屬禁繫決責
 誠可憐憫去冬臣在興化日忽報海寇自明州侵犯福
 州及本軍界帥憲司督責會合官吏束手坐視無以為
 計所幸福州打造到未發大舟帥司差撥兩隻令鄭輝
 管押延祥寨水軍乘駕下海追捕遂得敗獲當時若無
 此舡海寇必致猖獗此皆已驗之事不可不慮兼福建
 地狹人稠雖無水旱歲收僅了數月之食專仰舟舡往
 來浙廣般運米斛以補不足倘或盡行起發民間定闕
 歲計臣愚欲望聖慈思患預防特降睿旨行下本路將

已籍定舡依舊分三番差使其當番人前期報告在岸
祇備不當資次從便營運庶使瀕海有力之家自此樂
於打造亦免見在舡戶差使頻併無以為生將來却致
逃移或誤國事取進止

甲首狀劄

王監簿庭珪辭召命狀 乾道七年

伏念廷珪年踰九十塵忝科第五十四載昨於隆興初
蒙恩召對獲望清光叨改京秩除國子監主簿尋懇免
供職乞祠歸鄉今復八年忽準乾道六年十二月二十
六日尚書省劄子備奉聖旨召赴行在廷珪餘生何幸

深願再瞻觀闕其如齒髮益衰兩耳重聽奔走道路實
難勉強欲望朝廷特賜敷奏寢罷前件恩命廷珪下情
不勝戰懼懇祈之至候指揮

吏部趙尚書雄論侍從隨赦加恩劄子淳熙三年

伏觀二月十七日赦書內一項應文武官合加恩者並
與加恩本部檢準司封令諸文武官應理七年已上若
取旨及不磨勘者並隨赦加恩餘但給告即加稱加恩
者功臣階勳爵邑皆是考功令應磨勘奉直至中大夫
七年即是應理七年已上者係謂庶官奉直至中大夫
又令五品以上應磨勘轉官者具狀擬奏即是合取旨

者係謂太中大夫若職事官權六曹侍郎已上又令前
執政官該磨勘依待制已上法即是不磨勘者係謂見
任執政官其上件依司封令遇赦並合隨赦加恩又令
陞朝官因轉官應加恩者關到限次日報本選如此之
類即是餘官須候給告即加事理昭然本無可疑只緣
渡江以後本部不詳法意除文臣庶官奉直大夫已上
武臣右武大夫刺史已上隨赦加恩外凡職事官自權
六曹侍郎給諫已上至正尚書倘或階官未至太中大
夫必候因事給告始加封邑則是侍從官雖至朝議中
奉中大夫者反不若庶僚奉直大夫蓋侍從官自朝議

至中大夫止理三年磨勘故也循襲錯誤莫甚于此兼
檢照前輩文集遇赦加恩告詞甚多如劉敞集中有樞

密直學士吏部郎中

今朝請大夫

權知開封府陳升之遇大

禮加勲邑制龍圖閣直學士右司郎中李兌加爵邑制
并王珪文集有工部郎中知制誥王洙遇大禮加爵邑
制又有內外待制加食邑制今並錄白在前其他王安
石余靖等外制所載尤多足見內外侍從官止據職任
不繫階官自合隨赦加恩於訓詞中明著行慶施惠之
意實為得體况見今史院有名臣蔡延慶之子所著祖
宗官制舊典其論勲爵云熙寧後務減省故朝臣已上

遇轉官併加勳階若待制觀察使已上方特給告令却以朝臣之制施之侍從可乎參考典故檢照法令愈明白本部欲照條施行更取朝廷指揮伏候指揮三省勘會文臣奉直大夫已上武臣右武大夫刺史已上並隨赦加恩其侍從官事體尤重自合隨赦加恩施正月二十七日三省同奉聖旨依

省齋別稿卷第二終

省齋別稿卷第三

周益文忠公集八十三

青詞

功德疏

疏文 並代作

青詞

外舅設醮青詞 戊寅立春

人生總：捨妙道以奚依天網恢：視至誠而則格稽首望層霄之表洗心陳一介之愚伏念臣某等並以冥頑仰資覆幬閱歲月日時之久善無聞焉凡行藏視履之間罪固多矣運適逢于惡弱家寢失于平康居懷臨深履薄之憂敢緩跼厚踏高之懇迎春陽之開動哀羽士以薰脩緒琅函瓊笈之寶書延金闕玉京之飈馭伏

望寸誠昭徹列聖監觀貸其既往之愆開以自新之路
福莫長乎無禍倘蒙大造之曲成吉不僭而在人誓與
闔門而共勉

建康府為皇太后設醮青詞 己卯

慶集慈闈方介萬年之永時當秋令稍愆六氣之和聖
神正切于問安臣子當勤于致禱肅裒淨侶祇被崇壇
諷三洞之瓊章延九霄之飈馭式憑道蔭仰贊坤儀伏
願上帝儲休萬靈介祉衍椿齡于南極輳藥喜于東朝
同金母之長生後天而老副魯人之善祝俾壽而臧

茅山 己卯

壽祉無疆方隆坤載節宣或爽未格時蘇眷惟句曲之
山夙號列真之宅仰體聖神之意俯殫方國之誠祇按
仙科肅邀羽士琅函瓊笈啟三洞之靈篇風馬雲車延
九天之法駕曲盡薦縈之禮異臻勿藥之功伏願上帝
監觀寸誠昭徹來善祥于霄極介景福於慈闈孝莫大
於親寧上副九重之願天必從于人欲下符四表之心

徐憲設醮青詞 己卯四月

死生有命固修短之難逃父子主恩忍幽明之遽隔念
逝水莫回於下地惟真科可籲于上天不勝駒犢之情
轍効潢汙之荐伏念臣某次男某未登弱冠忽染沉疴

雖竊深惟疾之憂尚庶幾勿藥之喜豈期不淑卒至云
 亡恍惚四旬疑聲容之猶在冥茫厚夜痛體魄之安歸
 深惟此生夭折之繇大懼宿世愆尤之積欲圖拯拔必
 假薰修叩絳闕而後壇場按赤文而陳簡籙肅延淨侶
 諷三洞之靈章廣設華燈破九幽之惡趣式哀衆善少
 濟冥塗伏願宵極鑒觀颺游降格憫臣心之懇切許臣
 子以超升罪刊黑簿之中魂越朱陵之上更憑妙道結
 未了之因緣誓與闔門戴無窮之造化

金陵府治求雨青詞

同前

旱而欲雨在衆庶以皆然窮乃呼天豈守臣之敢緩惟

金陵之巨屏實江表之通都師旅雲屯常資于豐稔室
 廬櫛比尤畏於鬱攸迺自三春以來暨于首夏之際既
 久愆于膏澤仍屢困于融風農末俱憂公私告病雖曲
 祈盡求之禮殊未知霑足之期自非請命于穹蒼何以
 救民于塗炭用涓灑旦祇被靈壇裒淨侶而演瓊章按
 真科而陳菲荐伏願俯垂淵鑒曲軫鴻慈大施三日之
 霖亟解一方之厄金穰可望既無艱食之虞火沴自消
 咸有奠居之樂敢忘飭勵仰答生成

方卿元日設醮青詞

庚辰

四序更端甫臨於元命九霄在望輒控于愚衷臣以驚

材夙資鴻蔭陰陽默運倏甲子之一周歲日俱新適庚
辰之並紀即官居而汎掃遵道範以薰修稽首端誠齋
心謝過冀蒼穹之下濟俾丹懇之上通慶集親庭常保
康寧之福身安仕路永逃瘵曠之愆誓堅金石之心仰
答乾坤之造

郭元嘉設黃籙青詞

物皆有死惟短折則可哀人孰無情在弟昆為尤切眷
言同氣脩歷多艱雖一第之成名幾十年之不調僅露
寸祿遽迫大期繇多生罪垢之弗除且今世愆尤之重
積自貽伊咎遂隕其生不勝手足之悲輒効潢汙之薦
投誠簡籙請命穹蒼仰繫覆幬之仁俯濟沉冥之苦天
倫已矣悼友愛之莫伸地戶恍兮惟超升之是望

又設醮青詞

無微不達蝼蟻之至情有感必通乾坤之大造伏念臣
雖依道籙未脫世塵昨因伉儷之私嘗啟熏脩之願偶
緣多故頗致遷延逮困宿疴愈懷兢畏召集黃冠之侶
恪遵清醮之儀冀贖前愆且微後福舉室倘臻于康泰
終身永奉于高真

尚氏姊本命日設醮青詞

乙酉十二月二十五日

天無不覆其大難名人有所求惟誠易感嗟稟生之多

既嬰痼疾者積年勢乍已而復加藥屢更而未効豈涉
 世動違于禁忌獲戾如斯抑宿生多積于愆尤貽災以
 此惟道蔭有祈禳之理惟真科開懺謝之途適臨元命
 之辰密應新春之候輒殫悃愍虔致熏修雖上穹之聽
 益高然匹婦之情可達冀永蘇于病質誓仰戴于鴻私
 十三弟設醮青詞 庚戌夏
 罪愆增積久獲戾于神明限數災屯遂纏疴于床枕既
 知悔懼敢急祈禳仰祈鴻造之監觀俯念微生之困殆
 貸其往咎許以新圖早收藥石之功獲保桑榆之景

功德疏

乾龍節功德疏八首 戊寅

正陽紀月來瑞乙之嘉祥薄海望雲啟飛龍之令節不
 致叢霄之禱曷殫方國之誠孝慈淵聖皇帝陛下伏願
 誕受天休函蒙帝祉脫三十年之否運回一萬里之安
 輿享福康寧遠邁人皇之上壽願神間燕永觀宣后之
 中興

麥秋應候夙開夢日之祥寰夏傾心遙致後天之祝叩
 金闕玉京之境繡琅函瓊笈之書伏願上帝儲休三靈
 介祉五百里之荒服亟返迷塗八千歲之大椿更隆睿
 筭

長發其祥當首夏清和之候誕彌厥月罄多方頌禱之誠望金闕于九霄演瓊章于三洞伏願兩儀克相萬福永應俯順衆心輟瑤池之西宴仰憑道蔭自赤水以南歸

夢日儲休早應群龍之集望雲祝聖共祈八駿之歸祇叩清都虔伸丹懇伏願函蒙多祉誕受殊祥歷三紀而狩窮荒既備嘗于險阻錫萬年而歸中國期永享于道遙

南訛初秩夙聞里社之鳴北狩雖遙敢廢封人之祝肆稽舊典高詠靈篇伏願妙道扶持清躬燕預民之所欲

祈速返於鸞輿天且弗違更茂延于鴻筭長發其祥適在清和之候誕彌厥月預伸頌禱之誠即金界之淨坊演貝多之祕曲伏願壽同無量福過大千俯順衆心輟瑤池之西宴仰憑佛力自赤水以南歸正陽紀月甲觀開祥聖若宣尼尚處九夷之陋誠同漢嶽遙伸萬歲之呼伏願十力證知三靈孚佑必得其壽如沙劫之難窮式適其歸等佛身之無碍瑞乙應期昔啟聖神之運飛龍紀節今逢震夙之期式瞻滿月之容遙致後天之祝伏願乾坤協佑屯否潛消十一月之朔巡早回虞帝萬千歲之眉壽遠邁魯侯

天申節功德疏八首 同前

日永蒼龍正火德熾昌之候星流華渚叶真人震夙之
期虔修最上之乘仰贊方增之壽皇帝陛下伏願備膺
純嘏誕保洪基怙冒群生等慈雲而徧覆照臨四海與
佛日以常中建康府

猗蘭紀瑞聖神膺申命之休貝葉繙經夷夏祝降年之
預保釐之列彌勤歸報之誠伏願德茂 新福臻
時萬寶圖寅御聰明睿智以有臨玉曆增延筭數譬喻
不能及

景風應律序已正于朱明飛電騰輝符有開于赤帝欲
罄延長之禱敢祈調御之師伏願誕保鴻休溥將駿命
清蹕而朝萬宇永居宸極之尊後天而 三光常奉慈
闡之養

帝圖有永仰上聖之膺期佛力無邊紆下情而致禱集
龍天之妙勝禪海嶽之深崇恭願舜日光昭堯雲布護
巧曆莫推其筭數多男更茂于本支與國咸休常奉慈
闡之養因民所利俾同壽域之躋轉運司
戊寅

里社夙鳴際千齡而啟聖潮音普震馨九有以祈年矧
將命于和門宜輸誠於梵刹伏願佛身常住僧劫難窮
為大法王永副山靈之託作百神主常膺高嶽之呼

天純佑命固已格于延鴻民懷有仁自難忘于頌禱集
祇園之淨侶慶甲觀之昌辰伏願乾健時行豐亨久照
商后嚴恭而自度永觀帝德之敷周王安樂以延年坐
擁天休之至

虹渚流光啟神聖挺生之旦鷲峯致禱罄華夷歸報之
心恭願如日照臨體天覆轉壽考越萬年之久子孫開
千億之繁夏清冬溫常奉東朝之養丁纏丙度永占南
極之祥總領所
已卯

猗蘭紀瑞當誕彌厥月之期貝葉繙經致于萬斯年之
祝式裒衆善仰贊中興願乾健常行離明久照四大而

王居一并包有截之區五福以壽為先增衍無疆之數

轉運司
已卯

會慶節疏三首

三省例委撰
壬午

開啟

帝立予以生商適臨良月民同心而戴舜初紀誕辰虔
修最上之乘仰贊方增之壽皇帝陛下伏願乾行不息
離照常中成魏：蕩：之功衍赫：炎：之祚適安遠
至垂裳觀萬國之朝地久天長畫衮奉二親之養

滿散

帝圖有永慶上聖之膺期佛力無邊紓下誠而致禱已

集龍天之妙勝度禪海嶽之深崇皇帝陛下伏願誕保
洪基備膺純嘏九州四海皆底貢於端闈億載萬年永
稱觴于德壽

功德疏

重華協于帝紀會慶之嘉辰衆美効之君罄羣臣之善
頌既家國值非常之喜宜乾坤儲莫大之休皇帝陛下
伏願坐振皇威益恢孝治以盛德而一華夷之統以至
尊而承父母之顏轉聖王之四輪咸休天覆歷賢劫之
千佛永保君臨

疏文

皇太后服藥蔣山疏文 己卯

壽祉無疆方隆坤載節宣或爽未格時和眷鍾阜之精
藍實能仁之勝地仰體九重之意俯殫萬國之誠設淨
供於人天集殊因于梵釋冀憑慧力速臻藥石之功益
永徽音更茂松椿之壽

皇太后服藥赦書賽諸廟祝文 己卯

恭惟聖天子以舜文之孝方問安于東朝爰需湛恩徧
秩群祀庶資陰相共介康寧願延萬壽之期永受九重
之養

建康府為皇太后舉哀疏文六首 己卯

變鐘長樂倏聞坤載之傾悲動含生成切毋懷之慕式披梵典恭布哀誠大行太后伏願頓悟真如圓成妙果翟車縹緲並遊極樂之方鹿苑逍遙更結摩耶之侶馳馭遐升無復慈闈之啟驚峯精禱敢忘冥福之祈恭仗佛乘仰酬坤載伏願一真不昧萬行常圓同佛母之在天永居梵率因女身而證道有若文殊

坤儀厭代莫延中壽之期孺慕興哀頓失東朝之恃不資釋典曷助仙游伏願悟五蘊之皆空湛六塵而不染繇法雲地登正覺之道場乘般若舟到菩提之彼岸駟車既閱永虛長樂之朝貝葉可翻仰扣大雄之坐式

資妙果用展哀悰伏願頓悟無生常除有漏三山已隔莫瞻馳駕之遊十地非遙願值龍華之會

東朝厭世共悲大地之傾西竺繙經爰致普天之禱庶憑法力仰助仙遊伏願境悟空花功成妙果徽音常在如夜月之印潭真諦是依乘慈航而濟岸

長樂告終倏歎毋儀之隔綿區奉諱共懷坤育之恩恭修最上之乘仰助遐升之路伏願觀身如幻了世無常密仗真詮既坐超于十地翕臻冥福更垂祐于六宮

請寶公祈雨疏文 己卯四月三日

自春及夏久愆膏澤之施若吏與民咸有旱乾之惧雖

靈祠之徧走迄誠意之未孚仰惟無礙之慈悲夙副有生之願欲敢勤象駕迂願法筵俟黔黎共罄於瞻依庶哀憫曲垂於極拯球伏願至仁易感洪誓不違出慈雲鍾阜之間隨車而至霈法雨秦淮之上及物無遺永言歸饗之心全賴生成之賜

祈雨雪文三首

未祈禱間得雪遂不用已知

道觀

天覆群生禱祈必應時臨穹牖潤澤偶愆薶麥可虞癘疢或作祇叩博臨之鑒冀垂下濟之仁呼風雲於朝夕之間霈雨雪於冬春之際庶豐年之協應致沴氣之潛

消警竭微誠仰酬洪造

佛寺

歲云莫矣適因常暘雨以潤之正須惠澤用竭一心之懇式瞻兩足之尊惟六出之花繽紛來下則兩岐之麥秀實可期仰繫無礙之慈速副有生之望

寶公塔

豐年所繫皆卜於冬春嗣歲將興尚愆於雨雪敢歸誠于鍾阜用微福於金容瞻彼慈雲願散彌天之潤擴茲慧力亟書平地之祥惟二麥之無憂則一圻之有賴省齋別稿卷第三終

省齋別稿卷第四

周益文忠公集八十四

啟一 並代作

謝宰執啟

以下十九篇並代外舅
紹興二十六年

假以近郊印已戴陶鎔之賜縮其遠次益銜造化之恩懷
 組綬以于征見吏民而伊始伏念某天資推鈍地望單
 平識非五總之龜學止一班之豹難辛官牒兢畏官箴
 謂我朱愚人咲南榮之智為官拓落客騰揚子之嘲十
 年陪駕序之聯終日負鷄梁之愧力上投閑之請遽叨
 共理之除由大鈞方播於無垠故小子亦容於有造遵
 塗浹日及境宣風將何施設于教條惟在奉承於法令

夙宵自省僥冒為多茲蓋伏遇某官感會三辰昭明百
度密勿臯夔之任弼諧堯舜之君橐籥含生罄邇遐而
畢遂摧衡多士隨輕重以皆平遂致妄庸亦塵任使惟
是桐川之壤未遙楓陛之朝訟簡刑清雖曰庸材之可
勉民貧地狹柰何經費之不充方當涖職之初預積瘵
官之懼頽少寬于筭策庶自竭于疲駑狄山居一障之
間既蒙優假嚴助奉三年之計更賴生成過此以還未
知所措

與江東張帥啟

三徑就荒未決歸田之計麾出守誤叨乘障之恩已諏

龜卜之良祇佩魚符之寵伏念某學雖有志才不逮人
少也孜：妄冀事功之立老而碌：但慚廩稍之縻昨
叅風憲之糾繩謬贊露門之誦說自知無補力丐投閑
荷上聖之曲憐假附庸而共理幸居巡管庶追譴訶恭
惟某官性兼忠孝之資世受天人之學蚤由一德歷事
三朝紫微屢告于辰猷青瑣旋升于夕拜鷄翹豹尾六
卿居法從之光井鉞參旗萬里折遐衝之侮久袖經綸
之手益勤啟沃之心符刻玉麟暫付陪都之籥鼎調金
鉉即遊揆路之沙某猥以孤蹤仰依巨蔭惟是桐川之
偏壘號為江表之陋邦財賦匱窮封圻褊小絕長補短

尚不足於平時送故迎新矧數更于長吏深虞譴薄坐
致顛濟正資大府之教條用作屬城之矜式居如何武
諒無赫之稱踈若班超願展平之策歸依之至敷
述奚周

徐憲頌德

恭惟某官與學邁倫清徽表世奮勵才猷之茂踐揚中
外之多卿寺郎曹最為舊德州麾使駟迭奏新功茲圖
壽俊之賢暫付祥刑之寄綠扉鞠草既仰助于好生紫
索持荷諒旋膺于促召曷為公論匪曰諛言某猥以孤
蹤仰依巨蔭惟是桐川之偏壘號為江表之陋邦財賦

匱窮封圻禍小絕長補短尚不足於平時送故迎新矧
數更于長吏深虞譴薄坐致顛濟惟外臺有以庇之則
屬城免于戾矣素秋淒肅玉節光華願調六氣之和坐
使百祥之合

周漕誦德

恭惟某官國器宏深天資茂粹問學造聖人之旨詞章
為王度之華早著英聲踐周行而最久徧臨劇部論膚
使以推先茲疇澄按之庸荐付轉輸之寄方睿哲益新
于施設宜者明首被于褒遷佇聞芝檢之頌入預荷囊
之挈曷為公論匪曰諛言

下同
提刑

葉漕頌德

恭惟其官國器宏深天資茂粹與學究聖人之旨英詞
追作者之風比協廷僉亟頌驛召奉常議禮方躋清切
之途便殿天模俄奉皇華之遣錫名駒于天廐寓美職
於瀛洲欽聞攬轡之初已著埋輪之譽行歸表著高步
禁嚴下同

徐總領頌德

恭惟其官國器宏深天資茂粹識前言往行以蓄其德
有令聞廣譽而施諸身早自奮于才猷嘗徧儀于中外
璧琮無玷愈久益新松栢有心雖寒不改復綴九卿之

少列獨司萬旅之餘粮佇褒寵于顯庸即超遷于法從
是為公論匪曰諛言下同

呂提舉頌德

恭惟其官與學承家清徽表世襲相門之舊德結黼座
之深知游歷劇繁益隆譽處比協搢紳之望擢升軺傳
之華足國裕民功既成于歛散摘山煮海効復見于富
饒佇聞芝檢之頒入預荷囊之挈是為公論匪曰諛言

下同
提刑

兼權臨安府戶部韓尚書啟

背觚稜而北去方近寒鄉紆組綬以西來遽臨偏壘未

知條教有愧吏民伏念某殖學淺膚稟生闔阨少無可
取真同樗散以老昏老復何能甘作鼠踰而慶怯昨收
朝蹟旋拜郡符之官無五百里之遙竊食預二千石之
列雖民貧而地狹幸訟簡而刑清于此庇身實為過望
茲蓋伏遇某官英資邁往精識絕倫總賦地官教周卿
之禮樂剽繁天邑用漢尹之春秋願政路之將登惟人
材之務進有如孤拙亦賜吹噓某敢不深體上恩勉勤
吏事發姦摘伏縱無一日之長宣化承流願奉三年之
計

權樞密都承旨中書王舍人啟

杜門掃軌瓜未及于齊丘便道之官竹已分于漢郡反
求諸己有愧于心伏念某穢線無長髻絲易老方群賢
之並進競樂居中頽弱質之無庸力祈補外分合投閑
而置散恩容宣化以承流惟是桐川介于江表雖民貧
地狹在薄材綿力以難勝然政舉人存有善教流風之
可法孤蹤自省微幸何多茲蓋伏遇某官德配先民文
傳正法贊模右府宣聖神道德之威演誥西廂鼓天地
中和之氣每推公論力獎遺才故雖朽鈍之餘亦在吹
噓之數某敢不勉思未至祈稱所蒙游刃發矧諒難追
于古訓伐柯取則期勉跂於前規

湯中丞啟

假以近邦已戴提撕之厚縮其遠次益知成就之深紆
 組綬以于征見吏民而伊始伏念某立身至苦秉德甚
 涼每惟骨相之屯敢有功名之望即省已成于白首憲
 臺濫綴于清班黽敏歲周摧頽人後始也群公雜進枘
 方不可以入圓及乎衆正彙征器小復難于用大推之
 理教允矣竒窮尚分東方千騎之麾實賴中流一壺之
 賜矧茲桐水未遠楓宸雖地狹民貧在綿力薄材而難
 強然人存政舉有流風善教之可師夙夜以思叨踰為
 甚此蓋伏遇某官氣全剛大道備中和歲寒不改於松

青風疾始知于草勁提綱栢寺既宿弊之頓除秉政槐
 庭矜元功之茂立每扶國是坐正臺評遂容蹉蹕之蹤
 猶在驅馳之數某敢不下同王舍人

凌正言啟

上同江東張帥伏念某稟生闈阨殖學淺膚棲遲名位之卑在
 苒星霜之易蘭省殆成於白首栢庭濫綴於清班黽勉
 歲周摧頽人後方群公之並進可謂得時朽頽質以自
 慚力祈補外分合投閑而置散恩容宣化以承流載惟
 僥冒之深必有黃緣之自此蓋伏遇某官氣和而粹道
 廣而周居然中坦而外莊不以澄清而撓濁烏臺三院

甫揚直諫之聲騎省七人旋賴彌縫之益俯憐擣樵夙
忝金蘭每曲賜于揄揚致獲安于竒拙居如何武諒無
赫之稱踈若班超願展平之策

褚臺簿

三逕就荒未決歸田之計一麾出守誤叨乘障之恩自
惟襪線之無長加以鬢絲之易老投閑置散理所當然
宣化承流斯為過矣載省叨踰之自寧無獎借之由茲
蓋伏遇某官問學粹精風猷警邁久儀仕路人皆嘆于
進難擢寘臺僚上獨嗟于見晚每推公論仰助清朝致
茲朽鈍之餘亦在吹噓之數

下同前

宣州樓樞密啟

輕萬戶以識韓早諧望履施餘波而及晉今幸依仁甫
視印章虔修竿牘伏念某學雖有志

下同江東張帥

假附庸而

共理布寬條而有倣託大芘以知歸恭惟某官博厚而
疏通溫恭而剛毅起千年之絕學獨步儒林振一代之
脩名徧儀禁路翰苑早敷于邦號樞庭再本於兵機又
安香火之祠高袖經綸之手方睿主益新庶政擇輔藩
分命于元臣欽大惠于一州錫康侯于三接圖任舊人
而共政佇慰民瞻咸有一德以享天永符帝賚其密瞻
上府獲在下風為滕薛之大夫已踰分量親龔黃之善

政願奉規模過此以還未知所措

答陳國正天麟啟

昔年幸會親觀淡墨之名晚歲倦遊坐遠金閨之彥豈謂不遺哀朽遠賦緘滕方塵容俗狀之可憎驚墨妙筆精之創見執謙良甚懷感至深伏惟某官道本師傳詞皆已出豹澤靡容于隱霧鴻毛果見於遇風帝席夜前對宣室鬼神之間學宮晨入誨諸生行業之勤諒無歲月之淹別奉絲綸之渥蘭臺謨著固將平步以登烏玉殿論思益亦歷階而升耳願慎寶調之術式符頌望之私其在悃悃曷勝言論

賀戶部王侍郎侯啟

趨朝天陛峻陟地官帝命有光人言無間恭以某官高文駿發懿行淳深奮才猷於百執之間備侍從于中興之始惟時心計尤東睿知故四明方樂於香凝而九賦復煩於鞭算昔漢嘗尊於計相至唐彌重于度支豈徒司金穀之繁抑以養鈞衡之望稍著裕民之効即膺共政之除某早辱言揚欣聞召拜屬佩左符之竹阻陪右席之賓瞻頌于中敷宣罔既

賀禮部辛侍郎次膺啟

召自侯藩擢升禁從諸儒改觀共欣掌禮之得人庶俗

何知亦喜正臣之在位恭惟某官持心本恕守道不回
早見知萬乘之君期無負平生之學進居諫省一言必
務于興邦退領祠宮三已莫窺于愠色身居鄱水名重
泰山逮隆當宁之思連奉賜環之命辰猷既告夜席盡
前咨伯汝作秩宗姑假塗于簪橐暨湯咸有一德即當
路于鈞衡某僻守小邦逖聞成命莫遂登門之願敢稽
贊喜之書頌詠于中敷陳奚究

賀提舉修書官万俟右相轉官加食邑啟

成書長樂宣制正衙冠五等以疏封躡二階而進秩僉
言允穆注意加隆恭惟某官碩大而光明直方而寬厚

異稟蚤符於帝賚英猷久峻於民瞻丁溥天綏靖之期
完右揆辨章之任既中外咸安于少事宜君臣俱樂于
無為惟茲駸馭之還尚闕鴻儒之紀肆煩茂宰親總宏
綱方和鉛舐筆以編摩俄緯典敷華而明備涓之穀旦
導以盛容薄昭迎后之儀揭日星而顯著虞舜慕親之
孝亘夷夏以流聞汗青恭寘于慈寧副墨仍藏于祕府
爰頒異數用答元功昔蕭曹居丞相之官初無聞于筆
削班馬擅史家之學第私紀于見聞豈如輔佐之賢榮
奉纂修之詔所載者非常之慶宜膺乎不次之恩曷為
家國之光華豈獨士大之歆艷某身游大治耳屬上儀

后益公集 卷四
拘綴銀符雖莫預班廷之數傾依玉鉉其敢忘賀履之誠

賀進書禮儀使沈左相轉官加封邑啟

上同 万惟茲駸馭之還尚闕鴻儒之紀昨頒中詔俾輯奏篇書薄昭迎后之儀以貽後代顯虞舜慕親之孝不在斯文汗青恭寘于慈寧副墨仍藏於秘府肆頌上宰親總盛容眷紳肅穆以前驅禮無違者天日清明而顯相人皆仰之繫鉅典之克成殆聖時之創見宜舉懋功之賞用酬領使之勞非崇資峻陟無以示天眷之隆非書社陪敦無以慰國人之望甘茂十官之取何足與稽

張良萬戶之封固宜未艾某身游大治下同

賀湯右相啟 紹興二十七年

金甌名啟玉鉉位崇制命一傳歡謠四起竊惟至治之世必有非常之臣視君如腹心相王為左右用肩一德永底多盤歷選時髦孰為舊德斗宮運神樞之柄既在諸公之先上相處太微之庭宜應今日之拜恭惟某官氣充高厚忠貫神明濟世之才愈汲而愈富許國之節彌久而彌堅早由經緯之文親結聖神之眷精誠每竭燥濕莫移故凡見諸有為率不負其所學垂紳正笏判群疑於片言偃武脩文興長利於旋踵更化之際宣力

為多方時已安命相尤重民皆屬望久矣上亦虚心待
焉果副具瞻亟聞爰立談笑為治豈惟垂千載之規精
神折衝固可制四夷之命脩禮樂以召和氣進賢能以
起治功三代之隆遂將再見兩漢而下夫何足云其愚
有寸誠老無他技虞翻骨相自嘆多屯陶令田園分甘
歸去茲值播釣之始尚懷為御之初望賓客之後塵雖
知邈爾採士民之公論不覺欣然瞻頌之誠叙陳曷既

同前代聞人書庫

光膺典冊進總機衡屹若明堂得棟梁而愈固浩然巨
浸賴舟楫以安行渙號播聞輿情闔憚竊以輔弼之任

古今所難咨四岳以奮庸匪內由於獨斷使百工而求
野或外盡於周詢豈如聰明睿知之君久眷碩大光明
之佐積年詳試一旦登庸既聲名素稔於縉緹宜望實
交孚于華裔恭惟某官應期佐聖維嶽炳靈游夏淵源
洞八索九丘之學卿雲黼黻雜四時五色之文蚤擢殊
科立登要路春官儀禮明夏商損益之宜翰苑代言繼
盤誥聲牙之作亟被九天之渥延登兩地之尊柄幹洪
樞運籌而坐帷幄烽沉紫塞挽河而洗甲兵寢隆巖石
之瞻久徯沙堤之築果贊元而入輔遂當路以奮庸方
且感一人特達之知慶千載難逢之會股肱盛世著蔡

群疑篩庶事以鼎新措溥天於孟覆共欣聖主獲稷契
臯陶之良臣肯使太和在唐虞成周之際詩書所紀
勲業同歸某五斗為貧一官効智寢每懷於附鳳門屢
幸於登龍方此播釣敢忘躍冶祐甫除八百之吏雖匪
舊知晉卿舉七十之家尚容莞庫

問候沈左相啟

以下代方總領
紹興二十八年九月

蒙霧而行每潤身於膏澤遡風以望頻矯首於門墻當
九秋向杪之辰有萬寶告成之喜鼎梅久實和羹方賴
于商衡潭菊可餐遐壽宜臻於漢相輒彈懇款仰詞寢
興恭惟某官正直秉彝誠明貫道窮精微于三聖學有

本原掩述作於兩京文皆典則自進隆于國棟即茂立
于邦基獎拔群材共翊休明之運彌綸庶務密庸造化
之功三台仰驗于色齊九鼎俯知於器重楮紳歌詠中
興有丙魏之轂旒冕注懷廣廈論唐虞之際克凝丕績
絕擬常倫伏念某塵慮煩襟譎材曲學曩值延登之旦
首膺特達之知如彼枯魚驟激西江之水譬諸蒨室頓
延東井之光既遙跡于郎闈仍總儲于軍壘勉粗殫
於駕駕叨踰終愧於鵜梁仰藉洪鈞尚逃司敗鵝鸞接
武雖寸步之不前鴻鴈來賓顧尺書之敢緩其為瞻頌
罔罄名言

問候湯右相啟

含香錦帳身游坎北之鈞發軒轅門日注熒煌之座欽
想細旃議政廣業熙天茂隆旦奭之勲遂措成康之俗
神明所保福祿來同恭惟某官智蘊賢謨道先民覺以
聳壑凌雲之質柱石王庭以錡金戛玉之文笙簧帝典
自峻參于機幄旋進執於宰衡雖鎮以無為孰測廟堂
之密勿然見諸行事足觀輔弼之規恢內為百度之脩
明外則群王之綏靖大昭掛壁澄宵潛狼角之光嘉石
平民絕澗息禽遊之酷積為和氣散作謹謔方且進英
髦以共保洪基飾禮樂以助調元氣化郊天祭地告厥

成功緯典敷華傳諸後世太平責塞小人道消某襪線
無長鬣絲浸老牛溲馬勃辱採擇於醫師蟲臂鼠肝正
依棲於造化金莖露渥玉鉉羨調羹益獲于寢興永上
符于眷注瞻祈倍極傾寫奚殫

賀王樞密啟

明詔揚廷元樞正位有常立武基聖神宥密之謀無競
維人成邦國安強之勢真儒益進多士同歡恭惟某官
道本誠明氣全剛大詩書執禮六經皆務于雅言直諒
多聞萬乘素推於益友騫翔久矣譽問藹然詞掖奎坡
大冊高文之獨步經帷工尹昌言宏議之日聞自陟幾

廷愈擢廟略留戾佐漢功高三傑之中裴度輔唐名播
四夷之外擁軺出使仗節來歸有折衝厭難之勲無伐
善施勞之失况三軍五兵之運久此宣猷宜十行一札
之書茲焉進長寵數式隆於當宁恩章尤異于在廷既
用仲尼固知天下之無敵非如汲黯但使淮南之寢謀
某夙荷恩憐欣聞冊拜宏開沙館知多賀厦之人邈處
柳營獨阻登門之願其為馳頌實倍常情

賀吏部張尚書啟

寵錫綸言峻登文部任隆常伯獨專四選之權班冠從
臣允謂六官之長雖還舊物實茂新恩恭惟某官學粹

而文高氣和而節劾早登禁路憊形憂國之言又歷
藩方疊盡愛民之意既宸心之妙簡亦輿論之素孚
雖告歸力上於囊封而趣召屢頒于邦渙游神琳館進
讀金華數朝士於正元春風屢改得世于故國喬木猶
存方將倚重于股肱茲用假塗於喉舌稽諸周制天官
同冢宰之名參以唐規政府總吏銓之事惟時重任屬
我老成某又託餘輝逖聞異數願阻伸于慶禮實倍激
於懽悰

賀朱中丞啟

祇奉親除峻陞獨座絳駟清道一時欣覲于曠儀白簡

生風多士共觀于勁節恭惟某官性資誠慤局度方嚴
學窮六藝之源流文掃百家之擊悅自登朝列即締主
知操挺松筠歷三冬而不改質堅金石經百鍊而愈精
已騰騎省之轂稱旋振烏臺之網紀有猷必告無弊弗
除果膺非次之恩遂應允虛之選執法在端之門右是
亦假塗輔星明北斗之中即聞秉政理之必至人所共
期某屬奉使華阻于賓謁正臣得位既如鵬鷲之在天
善類歸心何畏豺狼之當路其為欣懌實倍等夷

問候葛侍郎啟

櫟社扶疎昔依仁于華省蓬心拳曲今結戀于朱門欽

惟賢哲之所臨宥有神靈之來相內凝道妙外納時和
恭惟某官應物以俊明之資處躬以渾厚之德詞章峻
潔如東流赴海之莫磯聞譽輝光若北斗麗天之可仰
掖垣掌制文部典銓世傳常衮之除書人服山公之啟
事謂合延登於黃闥云胡引去於清都結河山杖屨之
緣作茗水龜魚之主冲襟逸興雖寢忘紫橐之舊游雅
望英毅當勉為蒼生而再起某久應襍被尚許濫中蝶
夢空勞莫遂接辭之便魚書遠至少伸問訊之儀悃悃
所懷楮毫奚盡

賀何大諫啟

演語鳳池升班騎省后從諫則聖式嘉啟沃之誠臣事
君以忠愈藉論思之益恭惟某官執德弘而信道篤見
善明而用心剛自擢冠于南宮即締知于北闕曩由六
察進列七人造膝卷：補袞實同于山甫抗章纒：引
裾何愧于辛毗爰從左掖之聯就正大坡之拜青蒲屢
仗旣旌入告之嘉猷紫橐峻持更應久虛之妙選佇疇
言績叅秉政幾某外奉使華遙聞褒制莫展陽城之拜
敢稽商皓之書欣頌交懷喻言奚究

賀都司諫啟

底績右垣升華左掖忠言廟上雖寄任之不移正色立

朝知班聯之愈峻恭惟某官文高典則學洞淵源挺渾金
璞玉之姿時皆景仰負烈日嚴霜之操帝所親知召居
六察之官擢預七人之列風散鯁峭屢開白獸之搏諫
紙縱橫備著皂囊之疏式酬久次爰俾右遷臣事君以
忠補袞既彰於山甫后從諫則聖轉圜益顯於高皇佇
從耳目之司入踐股肱之任某屬縻使事阻造賓筵仰
賢哲之得時與士民而共慶其為欣頌曷罄敷陳

謝執政啟

代陳通判

戎期垂畢未瞻魏闕之觚稜詔旨中頒遽剖漢庭之符
竹頌牧民之寵厚知宰物之恩深伏念某智術迂愚宦

游連蹇三銓列屬被亟襍以汰埽萬里觀風突甫默而
報罷一投閑散屢改炎涼豈盛時獨棄於荆管蓋薄命
動迎于墻壁欽惟先德清白之高風藐視後人敢磷緇
于素守傷哉貧也誰者憐之旣生范氏之塵瓶之淵明
之粟晚叨起廢游俾游談章郡頻年坐對朝雲于南浦
臺城再歲飽聞夜鶴于北山居無可紀之勞寧冀就遷
之渥忽叨成命改付名邦方愧杲之依芙蓉而汎水乃
容高適出幕府以持麾之官雖後於瓜時揣分實踰于
擗散茲益伏遇某官道隆先覺勳格皇天拳：致主之
清忠汲：求賢之美意衡量多士重輕無抄忽之差澤
潤群生遐迩失焦枯之患欲廣聖神之德尤嚴師帥之
官何取妄庸亦忝任使某敢不愈堅末路靡負初心戴
授契之殊知謹銘藏于茲日追龔黃之善政尚鞭策于
他時過此以還未知所措

省齋別稿卷第四終

疏寵嚴宸觀風劇部除書誕布公議咸歸伏惟某官雅
 望映時宏猷經遠剖符黜歛比聞報政之優易節湖陰
 旋舉疇庸之典未周歲籥彌著治穀與其勞飛輓於遐
 方孰若展施為于近地果膺褒詔改畀使華攬轡登車
 暫屈澄清之寄持荷簪筆即躋侍從之班某幸以哀蹤
 將依仁庇日俟前驅之至庶諧宿霧之披欣忭之私敷
 陳罔既

省齋別稿卷第五

周益文忠公集八十五

啟二 並代作

賀李漕 植啟 以下代帥紹興二十九年

疏寵嚴宸觀風劇部除書誕布公議咸歸伏惟某官雅
 望映時宏猷經遠剖符黜歛比聞報政之優易節湖陰
 旋舉疇庸之典未周歲籥彌著治穀與其勞飛輓於遐
 方孰若展施為于近地果膺褒詔改畀使華攬轡登車
 暫屈澄清之寄持荷簪筆即躋侍從之班某幸以哀蹤
 將依仁庇日俟前驅之至庶諧宿霧之披欣忭之私敷
 陳罔既

賀江東陳憲啟

一札疏榮六條問俗畫衣冠而民不犯上既廣于好生
送禮樂而遠有光下咸爭于快觀恭惟某官明察秋毫
而行之以恕學周世用而濟之以謙雖靖共自守於班
聯而望實交孚於中外肆倚月卿之重来分星使之權
昔嘗司天下之平尚多游刃今乃仗江圻之節寧有冤
民初聞繡斧之風馳已見旄倪之相悅諒靡溫于坐席
即歸侍於細旃某誤剖藩符實依臺庇周爰咨度遙知
四牡之勞惠然肯來冀慰一方之望

賀王樞密啟

誕頌帝則擢貳幾廷仰帷幄之得人知簪紳之交慶恭
惟某官才高而學博質厚而氣剛精忠自結於深知雅
望寢儀于近列代言翰苑詞章寧愧于常揚勸講露門
議論力窮于游夏方上聖益新于政化斯群工並赴于
事功乃眷弼諧尤嚴宥密雖星低大白靡勞三傑借箸
之籌然樞運斗宮實贊七德安民之武克付本兵之寄
孰踰名世之賢某幸託洪鈞竦聞成渙屬藩符之拘綴
阻賓閣之進趨欣頌交懷叙陳奚既

回陳都官啟

外臺報政真館就閑既從香火之遊宜介神明之祉伏

惟某官性資端亮才力恢宏分符馳豈弟之稱攬轡著
澄清之効溪山行樂姑暫適于雅懷簪橐需賢即趣頒
于召節某欣聞彌蓋尚阻披雲方圖尺牘之修遽辱長
牋之貺其為感荷固既敷陳

回陳同知除知院啟

誕頒宸綽進長籌惟兵本不移民瞻愈峻恭惟某官才
高而學邃志大而氣剛以精忠隆當守之知以厚德洽
在廷之譽禁塗累歲屢彈告后之猷政路踰年力贊安
民之武宜膺大任遂正元樞方四夷稱都護之觴而中
國偃靈臺之伯垂紳正笏曾何殺氣之勞出策畫奇自

有幾微之略既中外折衝之所繫宜聖神注意之加隆
某竦聽郵傳幸依鈞播屬藩符之拘綴阻賓閣之進趨
欣頌交懷叙陳奚既

賀宣州魏叅政啟

起從家食就領州麾印組一臨吏民交慶恭惟某官氣
全剛大志蘊經綸與道卷舒三仕三已而奚恤逢辰休
顯一都一俞而有為正隆維石之瞻遽念急流之退雖
雅志自安於琳館而高名常在于金甌欲令赤舄之邁
歸先為蒼生而再起惟宛陵之與壤實江表之名藩既
風俗之素諳宜教條之易布溪山行樂方巾擇勝之車

老稚縱觀俄擁班春之飾諒靡溫于坐席已亟築于堤
沙其久矣懷歸尚茲假守漳潮相接深慚政事之不同
虞號為鄰竊幸齒屑之為輔其為欣忭因既敷陳

賀鎮江董知府啟

升華中祕擢守南徐綸綍初頒旄倪昏悅伏惟某官忠
存霸府譽冠時髦雖迴翔久試于外庸而東注不忘于
上聖昨奉楓廷之對亟參蘭省之班逮出總于軍儲仍
就紆于州紱三年考績方稽虞氏之舊章滿歲為真姑
用漢京之盛典矧寓石渠之直彌增銅虎之光言念哀
蹤密依鄰庇政棠陰之在望知河潤之旁霑欣幸居多

叙陳奕既

賀田開府啟

奉詔十行視儀三事式表旂常之績有光帶礪之盟伏
惟某官智勇兼資韜鈴洞貫自徹邊疆之警即宣江漢
之威登齋戒之壇既久頌于六纛陟尉安之府亦坐閱
于八年茲疇經武之庸併舉懋功之賞碧油紅旆不移
細柳之屯赤鳥繡裳增換雲臺之像某遙霑河潤喜聽
廷揚曾尺牘之未修辱雙魚之先逮其為欣悚難盡名
言

回柴參議啟

拜命中朝贊謀外閫雖抑九霄之步實增十國之光伏
 惟某官靜慎弗渝疏通無滯襲爵嘗聞于公社試才又
 歷于宦途茲煩席上之珍來主幕中之辯庾公之依淥
 水哀蹤預有榮為樂廣之善清談婉畫可無憂矣曾柔
 緘之未布已華翰之先臨慰感兼深叙陳奚既

回吳漕啟 代徐漕

觀風底績易部示思念寄委之加隆宜士夫之胥悅伏
 惟某官器涵渾厚學造淵深才猷見于施為智略形于
 議論比上歷陽之最就登淮甸之車逮膺改命于鄰封
 益表注懷於中禁去思來暮騰兩路之歌謠咸浹惠孚

聳百城之畏愛竚奉綠綈之詔入陪紫橐之游某又愧
 瘵官尚叨換節迫于行邁雖不容雲霧之披辱在交承
 恐未免批糠之簸尚稽展慶遽辱惠音惟欣感之交懷
 匪叙陳之可究

賀江東王提舉啟 代吳漕

膺時遴選為國外臺見九郡之吏民道一人之志慮伏
 惟某官剛毅有守純明不欺輔之問學之淵源發以詞
 章之黼黻參華宗寺攷績銓曹雖清路之游更領外庸
 之未訖粵勤剖竹復預乘軺總倉儲歛散之權幹山海
 阜通之利民財既裕國用自饒言遠有光方聽皇華之

遣見知則悅即歌四牡之來其聯事雖新傾風惟舊麟
鴻可致敢稽執訊之書原隰交馳行快披雲之睹其為
欣懌難盡名言

賀吳漕啟 代張帥

疏寵嚴宸改轅劇部除書誕布公議咸歸伏惟某官以
德潤身用儒飾吏承流宣化著美績于歷陽激濁揚清
藹休聲于淮右將趣賜環之召先頌易地之恩寄委加
隆眷知愈厚輶車載路方詢舊部之民風綵鷁橫江已
見新封之候吏諒靡淹于芳歲即歸挈于荷囊某幸以
衰蹤行依仁庇日後前驅之至庶諧宿霧之披

回淮東朱總領啟 代張帥

足食轅門升班省戶公言無間使節有光伏惟某官毓
德粹醇稟資開敏維其時矣親承黼坐之知是以似之
克濟相家之美比輟丞於九扈來總賦于三軍允惟心
計之優坐致邦財之裕迨茲踰歲果被陟明錦帳含香
姑歷階而少進禁塗簪筆矜越次以殊遷某幸借鄰輝
欽聞褒詔曾尺書之未布辱疊璽之先臨欣悚交懷喻
言曷既

賀賀叅政啟 代總領

詔錫綠綵位登黃閣間兩社以為公輔助調鼎為之和

有一德以享天心上炳杓魁之象傳聞所逮闔憚惟均
竊稽藝祖之宏模參考唐朝之舊制敷求英傑肇置疑
丞密次台躔禮秩僅餘於一等同升政路絲綸首拜於
二人共圖大噐之安永底巨川之濟洪惟累聖並守成
規任至重則才實難寵既深而選宜遴在昔率多于成
德于今尤擇于著英國有人為民昏悅矣恭惟某官學
闕百聖望貫三朝直道而行養其氣以剛大古訓是式
尊所聞而高明方思皇多士如周后之時越圖任舊人
美商邦之政首頌召節擢寘禁塗南宮久罄于論思東
省最高于封駁旋率三銓之屬進儀八座之聯虎殿侍

言冠諸儒之清選麟毫授簡成萬世之信書既劇繁華
要之徧更宜輔弼贊襄之有賴方且許身稷契致主勳
華疊：周詢務旁招于俊又攷：入告庸上合於忠嘉
惟成功與日以俱新則置相指期而可待某聯榮卿寺
總賦師干大用得賢喜聽傳郵之命群情交慶將遊播
物之鈞欣幸居多名言奚既

同前代漕

誕布絲綸進居廊廟仰摸乾度粲芒色於輔星俯視所
朝叅班聯於揆路正臣登用善類懽愉竊觀致理之朝
慎擇爽邦之俊左師右保既資二相之變調前疑後丞

復賴四鄰之啟沃典謨所載勲績具存古我先王圖任
舊人而共政受天明命咸有一德以享心偉此道之復
興幸是身之親見恭惟某官精微而闕廓柔惠而直方
以經綸之學暢皇猷以黼黻之文鳴聖代究心典禮家
傳慶普之書篤志清高早慕季真之操會黃屋鼎新于
政紀宜紫泥趣召于儒臣踐歷春官周旋夕拜紬圖書
于石室冠講讀于金華直道不回豈惟揚近侍之職忠
言無隱固已有大臣之風况又典于吏銓實首儀于法
從大厦方須于杞梓巨川正倚于艤艎越從喉舌之司
擢寘股肱之任已新巖石共瞻赫之師行築沙堤式

望堂之相某克員漕輓託迹鈞陶雖遙扣閣之期喜
際迓衡之旦泰和在唐虞成周之世方符揚子之言聖
主得稷契皋陶之臣願上王褒之頌其為欣抃實倍等
倫

賀湯相遷左相啟

代總領
九月

金甌載啟瑤札誕揚直德而無二心既著元臣之効統
百官而均四海遂登冢宰之官孚號遠傳權謠四達竊
考帝王之盛悉資輔弼之賢有若成湯命仲虺而為左
相逮于周室尊公旦而師萬民漢則蕭何實冠於臣隣
唐則如晦首釐于政事蓋德隆者位不可以不極而功

大者任不可以不專必有宗工乃膺巨用恭惟某官才
由帝賚道覺民先以經綸之學贊皇猷以黼黻之文鳴
聖世早摠可大之業入輔非常之君居多告后之謀猷
綽有濟時之勲業兵寢刑措蓋元首明哉而股肱良哉
時和歲豐故百室盈止而婦子寧止矧賢能之並用且
禮樂之方興厥功茂焉庶事備矣宜淵衷之妙簡躋元
輔以仰成仰契天心齊兩：泰符之色俯從民望聳巖
巖維石之瞻某外總兵儲逖違英袞間寵頒于顯冊實
倍激于歡悰敞東閣以延賢阻陪簪紱運大鈞而播物
正賴鑪錘欣躍于中指陳曷喻

同前 代吳潛

誕揚孚號進陟元台迪高后以康兆民久注淵衷之意
統百官而均四海式登冢宰之尊廊廟增光簪纓交慶
竊考迓衡之旦慎求當軸之賢惟吉士勵相我國家豈
特聖神之有賴用真儒無敵于天下實為華裔之具瞻
矧專魁柄于中朝獨炳台符于上象必契天人之望乃
膺典冊之頒恭惟某官道大而才高器闕而量遠文傳
正法與日月以增光識洞群疑如著龜之先見早由德
進深結主知亟叅法從于甘泉旋列詞臣于翰苑屈燕
許于筆下蔚為王度之華得頗收于禁中久借籌帷之

助逮正鈞衡之拜力調鼎鼐之和削浮費以具損德之
修堅鄰懼以贊親仁之寶太平功備衆正路開一身獨
繫于重輕萬乘方資于啟沃庸陞左揆祇答元勳異恩
疊進于文階真食益荒于書社九章赤舄聳上相之新
儀三公黑頭邁前人之盛事某幸逢亨會仰託洪鈞一
節以趨方驅馳于江滸千里而近阻奔走于門闌徒與
旄倪共深欣懌

賀陳右相啟

代張帥
十月

底績政途奮庸揆路濟巨川汝作舟楫式資利涉之功
若和羹爾惟鹽梅更賴均調之助廷揚顯冊風動綿區

竊以得賢為邦家之基論相乃人主之職旦奭股肱周
室適成夾輔之勳房杜佐佑太宗茂展相資之効偉真
儒之並用知景運之重熙恭惟某官學博而智周德全
而能鉅器稟廟彛之粹材隆國棟之雄直道而行養其
氣以剛大古訓是式尊所聞而高明久被眷于凝旒早
升華於從橐十年居外經綸益蘊于胸中一節還朝獻
納獨高于朝右粵由八座贊叅萬幾克壯之猷共推于
元老可久之業益表于賢人果誕布於策書肆延登于
宰席儀刑四海豈惟黔首之具瞻鎮撫百蠻將見單于
之却立某幸聯桑梓仰託陶鑄聞綸綍之初頒與簪紳

而胥慶望潭：之相府莫遂鳧趨瞻兩：之台符弟深
爵躍

同前 代吳漕

續讀命宸廷登庸揆路旦夕承履辟久參輔弼之聯左右
惟其人就正燮調之任陶鎔伊始遐邇同歡竊以自昔
用人莫難置相內勤詢訪固嘗咨四岳以奮庸外盡招
延亦或使百工而求野惟其擇之既審是以授之不疑
自非真才孰膺大任恭惟某官直方而寬博肅括而疏
明智周事物之先學洞天人表嘉猷入告早承宣室
之知要路立登久扈甘泉之駕名聲藉甚忠烈巍然比

由常伯之班擢寘前疑之列垂紳正笏益隆百辟之瞻
崇論宏言深得大臣之體宜正鈞衡之拜共調鼎鼐之
和聚精會神相得益彰密贊唐虞之主應變守文同歸
于治適觀姚宋之勳惟華夷永託於旃幪則事業有光
於簡冊某猥塵星使遙睇台符黃麻之似六經竦聽置
郵之命洪鈞之轉一氣願為躍冶之金慶幸攸深名言
奚究

謝執政啟

代人信陽軍到任

畢葵立之戎偶道譴訶臨申國之疆復叨寄委有詔條
可以遵奉有民社可以施為雖號守邊實榮分土伏念

某羈單寡援坎墮多艱牽絲三紀之餘泛幕十年之久
捫參歷井飽諳蜀道之難輿轎抱舟備習越人之驚晚
預題輿之列旋膺乘障之除卧鼓橐弓際會洗兵之旦
賣刀買犢招來復業之人之善聚之可書獲代歸而為
幸敢畱紫詔存畀朱轡矧是封圻介于淮楚當周宣之
復古命召虎以做城昔稱物阜而地偏今喜民淳而事
簡微躬曷稱洪造有歸此蓋伏遇某官道際天淵位隆
槐鼎甄陶萬物碩金成利器之功橐籥群生寒谷被陽
春之賜故雖遲暮未忍棄捐重念某生本江湖粗達閭
閻之利病仕經襄漢嘗安疆場之疲羸誓殫已試之勤
過此以還未知所措

賀湯丞相修徽宗實錄成轉官加恩啟 代總領

奏篇乙夜宣制剛辰既峻陟於文階仍陪敦于書社巖
瞻愈赫輿議均懽竊以遠攷漢儀序事獨尊於太史述
稽唐制修書爰董于相臣雖規模具著于舊章而制作
實隆于今日蓋舜孝有羨墻之慕欲文謨如日月之昭
裒二十六載之先猷寫之琬琰使億萬斯年之載籍炳
若丹青自非名世之巨賢安得主盟于大典恭惟某官

精微而閎廓柔惠而直方以道德而致君以文章而入
相華戎帖泰禮樂修明惟祐陵一代之貽謀久宜會粹
頌石室諸儒之廣記未訖編摩欲總宏綱是資茂宰一
命再命三命初循考父之墻大書特書屢書遂執昌黎
之筆歲時屬耳篇秩粲然銓次精詳無段公之逸事搜
求浩博增多遷史之舊聞冕旒恭覽以褒嘉簪紱環觀
而誦嘆果疊頌于異教用寵答於元勳某身在柳營心
馳槐位當誕揚于贊冊莫預班庭茲竊聽于卽音敢忘
賀厦傾依所積敷述奚殫

同前代帥

太史成書廣庭敷號進二階之峻秩衍千戶之腴田豈
惟酬翰墨之勲抑亦重股肱之體竊考帝王之制具嚴
簡冊之規堯舜之蕩：魏：捨典謨而孰見商周之灑
灑：即盤詰而可知古既遠而才寢難史雖修而文
或病馬遷之迄天漢尚頗謬于是非韓愈之紀順宗猶
有差于銓次欲前芳之獨掩捨大手以誰歸恭惟某官
精識幾神懿文貫道早懋賢人之業日親天子之光自
秉國均益孚民望以弼諧之餘暇提筆削之宏綱惟祐
陵神聖之資席我宋盈成之運克開厥後有二十六載
之貽謨皆聚此書欲億萬斯年之傳信既勒成于鉅典

宜寵錫於徽章其外剖麟符逃聞鴻渥莫展望塵之拜
敢稽贊喜之儀欣忭于中敷陳奚究

賀孟宗丞除江東運判啟

代漕

疇庸易節馳傳遵途頽此百城已稔風穀而昏畏有如
五技亦資雲蔭以少安既內激于懼悰敢外稽于慶牘
伏惟某官懿文貫道盛德潤身才名獨秀于諸儒議論
早參于前輩粵膺上眷久奉使華驅車徧歷于兩淮亦
勞云矣持橐尚虛于四禁曷不歸哉諒清朝已議於賜
環故近甸復榮于換節稍攄心計即阜民財某哀鈍無
堪黃緣有自告子文之政昔尚記于合符同士會之僚

今更慙于倚玉惟心所欲俟面以陳

賀王同知啟

以下代方卿

命錫綠綈樞分紫極帷幄倚運籌之略華夷輳奠枕之
安竊以周設六官司馬聯于冢宰漢分三府太尉列于
公台逮我聖朝尤嚴兵柄權均文武豈惟委寄之不殊
府設東西蓋亦恩章之並厚克膺大任允屬巨賢恭惟
某官碩大而光明方嚴而樂易懿文華國拔象齒以稱
竒敏識絕人知騶牙之為瑞蚤結凝嚴之眷徧揚清切
之班紫誥黃麻司內外坦明之制赤文綠字述本支蕃
衍之書聲名卓冠於在廷朝野共期于秉政果自文昌

之邃躡陞宥府之崇當波澄翰海之秋實伯偃靈臺之
際有常德以立武事靡勞南仲之師用真儒而歸侵疆
坐展仲尼之効其充員即吏託庇鈞陶峙糗糗于細柳
之營尚遙奉計陪簪履于翹材之館莫獲望塵惟欣疎
之交懷匪叙陳之能究

賀直院揚給事啟

塗歸東省瀑直北門論事激昂百辟憚回天之力擣文
揆麗四方傳擲地之聲用既值才人斯贊喜恭惟某官
秀鍾西蜀名冠南宮浩然之氣靡屈于胃中益全所養
作者之名獨高于天下孰不知歸早游蓬萊方丈之山

旋歷原隰皇華之選逮聖主益新于庶政宜真賢還侍
於中朝進叅武部之聯入勸華光之講將延登于槐路
姑詳試于荷囊朝遊青瑣之闈時批紫詔夕對金鑿之
殿徐草黃麻極近臣稽古之榮彰治世隆儒之盛某遊
聞成命倍激懽蹤省戶為即念夙依于宇蔭和門總賦
悵莫造于賓筵氣序暄和禁途清暇冀慎寢饗之節即
叅廊廟之崇頌詠于中敷陳奚既

賀禮部孫侍郎道夫啟

敷綸內史進位春官輟九寺之卿聯叅六曹之法從當
仁之慶有識所同恭惟某官秀稟岷峨駁馳京洛高文

大冊咲眉王之盈車博物洽聞辨青絲之綸簡早策集
 英之第久隆宣室之知以二十年儒館之英才名籍甚
 歷一萬里蜀川之守政譽藹然既詳試于外庸宜趣還
 於中禁典銓文部二職容臺茲回北道之轅遂挈南宮
 之橐禮樂自天子出正資獻納之猷籩豆則有司存更
 賴總提之力其逖聞成命倍激懽悰 餘同揚給事

省齋別稿卷第五 終

省齋別稿卷第六

周益文忠公集八十六

啟三 並代作

賀陳知院 誠之 啟 以下代方總領紹興二十九年

申頌鳳詔進長鴻樞班密亞于上台權實專於左府機
 衡有託廊廟增華恭惟某官道廣而用周氣和而節勁
 學精黃卷究八儒三墨之歸文振金聲合六律五音之
 奏自擢鰲頭之選即趨龍尾之階雙宇岩堯藹著師儒
 之望中臺與突久居禮樂之司左符方部於清源召節
 已頒於丹宸鑿坡視草胡公多典美之詞鄰境抗禮商
 侑葭幾微之色方時偃戢尤重弼諧延登兩地之尊參

翰萬兵之柄折衝厥難豈惟薄海之無虞宗論茲言更
覺大臣之有體果被聖神之眷就陞宥密之先示天下
弗復用兵丕贊周王之德使國人皆有所式正繫孟子
之賢光榮聳動于簪紳寄任愈隆於心腹某充員郎吏
託庇鈞陶方峙糧細柳之營阻曳履翹材之館

賀楊少卿啟

班集播紳廷揚綸綍冠孤棘外朝之位旌鈎陳上將之
功注意加隆折衝彌遠竊以周尊祈父俾專督於爪牙
楚命太師實兼司於環列蓋事權之所寄宜爵秩之俱
高矧在熙朝愈光舊典恭惟某官精忠貫日勁氣凝霜

敦邵毅之詩書備寇恂之文武蚤逢興運親結睿知昔
將壇旌動之秋屢出平于邊隙暨瀚海波平于邊隙暨
扈于殿巖肅萬旅以無譁弼一人而有恪勲庸久著資
望至優將梁三組以垂腰雖隆異數奉世十年之居位
宜有殊遷爰稽二公洪化之勞併懋經武整軍之賞錫
亞師之新命仍徵道之舊權戟纛遙臨增賁普寧之鎮
土田申衍益開渝水之封用光帶礪之盟式表旂常之
績某夙瞻威範適總軍儲望緹騎于章溝莫陪賀客窺
黃麻於奏邸徒極歡悰

賀戶部趙侍郎令詔啟

釋符越嶠持橐漢庭二千石之惟良入補六卿之闕三
十年而制用悉提萬貨之綱法從得賢輿情交慶恭惟
某官學高猷向德茂問平蚤奮勵於宏材寔踐揚于煩
使轉輸東廣素推抑強扶弱之稱澄按南閩尤得戢吏
愛民之指寓書林之美職鎮淞水之近藩資與望優譽
隨日至賜環超覲甫瞻天子之光鳴玉會朝已率地官
之屬方資心計式阜邦財始末源流豈析秋毫之小利
優游瞻足固殊畫餅之空談少施鞭箠之勞即贊棟隆
之輔某又烏仰斗邈爾披雲省戶司珍仰繫於館鐙轅
門總賦又托於旃幪欣幸攸深名言奚究

賀魏宣州啟

書頌一札夢應三刀起異時廊廟之宗工付今日股肱
之巨鎮印符甫至條教已孚恭惟某官華國文高經邦
道廣溫：自克如琮璜可薦於郊立凜：後凋若松栢
靡敬於霜雪早翱翔於兩禁旋總攝於三銓屢煩仗節
之行首定和戎之利帝以勲書竹帛趣填京兆之沙公
方志在煙霞高揖浮丘之袂逮宣室深思於賈誼俄延
英復召於裴公圖回大政之元剗革積年之弊遽援祖
宗之故事力祈中外之迭居已勤越嶠之鎮臨更屈宣
城之藩翰雖云新治時乃舊游既民情風俗之周知宜

周益公集 卷之六
德望恩威之素洽暨湯咸有一德寧久外哉惟說命總
百官即延登矣其夙叨造化喜聽絲綸職在兵儲莫展
朱轡之雅拜心依鈞播但遲赤舄之適歸欣頌交懷叙
陳奚究

賀兵部湯侍郎 允恭改除戶部啟

命出宸衷班升法從求懿德而肆時夏方叅武部之聯
歌南風而阜吾財就正地官之任事權增重眷獎彌隆
恭惟其官氣和貌粹而濟以剛學瞻詞精而貫乎道入
儀三院凜然形蹇諤之風出應二星籍甚得中和之譽
晝接來從於蜀道辰啟歸告於周行惟偃戢五兵靡藉

戎昭之經畫而低昂萬貨實資心計之幹旋用頒進陟
之恩式示登庸之漸某久勤仰斗未快披雲省戶司珍
仰繫於館鐺轅門總賦又竊於帡幪聞成化之誕揚激
懦衷而增喜三庚云伏九夏將蘭 調鼎食之和佇俟
堤沙之築其為欣頌固究敷陳

賀葉侍郎啟

祇拜明綸就升橫榻霜凝憲簡獨高峩豸之班風動朝
紳咸避乘駉之節正臣既進公道愈開恭惟某官學造
天人文叅典誥以誠懋靖共之搵濟輝光篤實之資方
彈貢禹之冠推輪雋軌俄請朱雲之劍砥柱顛波遂以

精忠簡于淵聽迨久更於外服始歸列於中朝議禮奉
常兼官華省旋暫持於龍節即入造于烏臺勁氣橫秋
鷲乘風而直上姦萌掃迹雪見現而自消果膺雄劇之
除益展剛方之志舉臯陶而不仁遠姑坐振於憲網用
仲尼而侵疆歸竚進叅於機政某依仁有日去德幾年
瞻佩印之駟雖阻陪於賀客扣典籤之吏顧敢緩於緘
書故拈于中名言曷盡

賀吏部賀尚書啟

光奉贊書峻躋常伯事叢任重實通四選之權地近班
高獨處六曹之長者英登進遠適惟傳恭惟某官學際

道真才周王佐秉資和裕如春風醇酎之可親遇事激
昂真烈日嚴霜之難犯修名早立要路久登雖中年自
樂於燕閒而正宇不忘於簡注比開公道亟列禁塗議
禮秩宗明春卿之舊典升華瑣闥振夕拜之頽風縈紬
石室之書入勸金華之講賀公兩命既遠繼於家聲甘
茂十官宜存承於帝渥粵從衆望擢冠適聯惟茲典選
之除自昔奮庸之漸周書分職列冢宰於天官唐制任
人兼吏銓於相府行叅大政用協前規某猥預郎潛實
依河潤屬和門之總賦阻賓閣之望塵欣頌于中敷陳
奚究

賀兵部周侍郎啟

策勲西省進位中臺事簡班高名列文昌之司馬職親
地禁實兼翰苑之主人命出自中權均于外恭惟某官
學海淵澄而百家並蓄文鋒峻拔而八面可當自稱首
於殊科即躋榮於要路判花西掖已閱再秋視草北扉
亦將累月比對揚於金殿形褒諭于玉音謂宣力為多
又處絲綸之職而代言有得具字簪紱之情爰錫異恩
併隆徽數夏官真拜少休六押之勞內相增榮就正五
甄之直寶帶煥黃金之寵襲衣頌出笥之珍頗收之在
禁中既坐兼于文武蕭曹之安海內竚登貳於鈞樞某

素辱庇隣欣聞進擢雖踰歲莫趨於塔祀而指期可望
於甄陶欣頌攸深喻曷既

賀左史洪舍人啟

螭坳序進鳳省榮兼九重欣嚴近之得賢多士慶英髦
之行志恭惟某官家承亮節名冠異科學通九流四部
之繁文播六狄五戎之遠昔烏涵養再陪藏室之神仙
今也騰驤並列清都之侍從珥筆稍更于晦朔敷綸存
峻於班聯惟左右史之設官有東西臺之分職儼曰識
曰才之兼善則書言書動以迭居矧禁掖之邃深發揮
帝制必詞章之瀕壘鼓舞民情自非鯨吐鰲擲之才孰

遶豹尾鷄翹之列殊知方厚大拜可期某遠奉皇華逖
聞徽數密隣桑梓倍深燕厦之情曼隔仙凡莫預龍門
之客其為頌詠因罄敷陳

謝執政啟

外董軍儲已玷諸郎之選中頒詔綽更叅少列之華廟
推特達之恩肺腑感曲成之造竊考百官之制頗高七
寺之聯雖由省戶以次遷必俟朝紳之衆允豈容齷拙
輒玷寵光伏念某窺管才疎挈瓶智小之前言往行以
蓄其德無令聞廣譽而施諸身區：寸祿之間默：衆
人之後究其老矣誰則知之比逢稷契之登朝力引蕭

朱而結綬滋蘭九畹亦及曲蓬種木千章不遺踈櫟既
擢承於司府旋進直於文昌每愧含香逝將襍被會列
戎之峙糧之使顧在廷須轉讓之才猥令十駕之駕來
主千金之費人間玉帳初無運粟之勞歲屬金穰况值
積倉之富縱道濟蘊沙籌之智且士安稱鞭算之能當
茲偃戢之秋何有設施之力矧伊陋質尤愧空餐但知
均節於陳紅仍復鈎稽于朱墨再基於此片善則止姑
容逃司敗之誅已為忝冒乃使綴介卿之位何以堪任
茲益伏遇某官默運洪鈞茂凝丕績輔成皇極無偏陂
以遵王叅繹師虞有謀猷而告后俯眷轅門之吏嘗陪

材館之賓播物何私雖徧加於庶類回春有信常首及於朽株遂使微縱坐叨優數某敢不仰銜搏埴益勵鈍頑非惟圖稱於詔除庶亦免貽於簿責掌九賦九功之貳固慙周典之官有萬鍾萬室之藏願助齊軍之政過此以往未知所裁

謝吏部賀尚書啓

以下代帥

支郡分麾方飲冰而就道陪京易地旋出綍以示恩伏念某早筮周行久聯法從主恩未報自驚蒲柳之衰家難遽纏徒抱梧楸之慕逮祥琴之甫御嗟藥棘之僅存逝將歸老于山林何意辱憐于旒宸甫憑熊軾俄昇麟

符豈伊藹薄之姿堪此頻煩之寵茲益伏遇某官儒林宿望禁路老成瑣闥高論駁之稱銓部著清明之効紬圖書于石室冠講讀於金華視君如腹心屢罄嘉猷之告相王為左右即聞大政之咨衆賢咸賴于主盟朽質亦叨於推轂某敢不布宣德意安靖兵民雖愧齊侯政亟成於三月尚追嚴助計可奉於三年感幸居多喻言奚既

吏部葉侍郎啟

訪京口之舊游甫祇成命易秣陵之新組更冒除書眷此會藩號為劇寄任九郡兵農之責全藉撫綏司一時

時管籥之權必歸信謹而某器資甚陋才力弗彊自經
憂患之餘尤覺精神之耗勿叨宅牧大懼壞官誰為汲
引之謀曾有黃緣之助茲蓋伏遇某官宏猷經遠碩學
造微鶚立臺端議論動關於大體鳳儀禁路銓衡不愧
於昔人史闡高謨次之功經幄致緝熙之益多士每資
於借助孤踪遂致于叨榮增秩賜金雖乏潁川之治搯
刀製錦尚逃鄭國之譏感幸居多喻言奚既

吏部沈侍郎介頌德

茲蓋伏遇某官文華緯國術業康時自連揖于賢科即
高騫於清路六卿率屬既登貳於天官三格修書復茂
明于皇統當論思之餘暇推獎借之公心遂致陳人猥
膺遴選民安渤海碩希龔遂之風福及京師更効細侯
之政其為感幸豈易多言

戶部趙侍郎頌德

茲蓋伏遇某官儒猷飾吏忠槩光朝早踐歷於劇煩浸
發揚於譽問幹旋版部方追晏選之風承弼政塗行表
間平之績當論思之餘暇推獎借之公心遂致陳人猥
膺遴選發奸摘伏雖有愧于古人宣化承流尚勉追於
循吏其為感幸固既名言

兵部楊侍郎椿頌德

月五日集
省齋別稿卷六
九
茲蓋伏遇某官名先多士望重一時編更內外之華彌
東聖神之眷中臺東省迭躋法從之清班西學北扉倍
極儒臣之榮遇爰以論思之暇曲推獎借之言遂致陳
人猥膺遴選民安訟理儆少助於中興政拙心勞顧敢
辭於下考其為依向實倍等夷

刑部黃侍郎祖舜頌德

茲蓋伏遇某官材堪國棟學貫經邦早占即位之星晚
上禁塗之輟臯陶之弼五教允賴明清蕭何之作九章
更資刊定爰以論思之暇曲推獎借之言遂致陳人猥
膺遴選竭其智力固無赫赫之名假以歲時或効平平

之策其為依向實倍等夷

工部侍郎晞亮頌德

茲蓋伏遇某官詞章辨博器宇恢闊久訓導于成均旋
雍容於宰士擢登法從姑董正於百工參預政幾即圖
回於萬務爰以下同前

周給事啟

秩二千石於南徐方被自天之命付十九符於建業誤
頒易地之恩觸熱到官涓辰視事言念庸虛之質又叨
獎擢之榮持橐甘泉鼠易窮於五技擁麾炎海馬幾敗
于百鈞逮纏風木之悲甫畢苴麻之制驟司宮鑰深愧

梁鵜茲益伏遇某官名冠兩科身兼數器屢告辰猷之
益峻躋夕拜之聯金匱紬書述作何慙於遷固玉堂視
草才華實儼於常揚俯眷孤蹤每推餘論遂致詔除之
寵薦分閫制之嚴坐撫軍民既竊蕭公之任兼容獄市
願師齊相之風感佩之深叙陳奚究

中書洪舍人 遵啟

一麾出守方便道以之官十國為連復冒息而易鎮惟
金陵之輿壤實江表之名藩人物浩繁蓋南北要衝之
地江山佳麗號古今形勢之區孰謂孤踪可司留鑰此
蓋伏遇某官家傳勁節名冠殊科演誥西垣鼓天地中
和之氣宣猷右府助聖神道德之威爰於獻納之餘借
以揄揚之助肆容異寵存及非才殿天子之邦既仰塵
於任使在諸侯之選願追繼于循良

起居張舍人 頌德

此蓋伏遇某官望隆國士名冠儒科君舉必書久珥螭
坳之筆王言作命兼裁鷗閣之文爰於獻納之餘借以
揄揚之助 下同前

朱侍御 啟

北固承流方飲水而就道金陵易鎮旋出綽以疏榮任
愈重而才微寵既深而懼集伏念某久聯冗從積愧空

餐曩分竹使之符遽失蘭陔之養琴既聞於切：棘猶
 嘆於乘：敢謂誤恩由憐舊物中詔亟頒於銅武半塗
 復昇於玉麟誰為推挽之謀曾有黃緣之助此蓋伏遇
 其官學窮聖祕智蘊賢謨右省拾遺首膺於親擢南牀
 執法大振於直毅剛明蓋稟於天資風采獨高于朝路
 游陪幾政用展壯猷方臺評務別於中和故閫制靡遺
 於哀朽其敢不勤求民瘼力報主知及馬問羊雖愧子
 都之智帶牛佩犢願回渤海之風感佩攸深指陳奚究

任殿院頌德

此蓋伏遇某官稟資勁正造道深醇粵從分察之聯就

進副端之職鶚乘風而直上衆正咸依雪見晁而自消
 群邪遠屏游陪幾政用展壯猷

汪察院啟

三年銜恤僅畢素冠十國為連遽膺丹檢惟秣陵之與
 壤實岳狩之別都人物浩繁據南北要衝之會江山雄
 偉號古今形勢之邦孰謂孤蹤可當遴選茲蓋伏遇某
 官稟資端慤植操剛方芸閣校讐萬卷默藏于胸次楓
 廷奉對一言密契於宸衷暫司糾察于六曹行振抨彈
 於兩院曲推餘論猥及陳人俾從憂患之餘亟冒蕃宣
 之寄某敢不奉揚德澤綏靖兵民上以酬聖神再命之

用益公集 卷六
禁下以慰一方父老之望其為依向實倍等夷

任察院文薦頌德

茲蓋伏遇某官氣和節勁道廣用周以淵源之學貳曲
臺以敏濟之才游銓部擢登烏府方觀久察之功進發
獸搏矜展剛方之操曲推餘論猥及陳人下同前

左司諫何溥頌德

茲蓋伏遇某官名魁俊造望冠眷紳烏臺躋六察之聯
騎省綴七人之列后從諫則聖方資論議之公臣事君
以忠即預弼諧之峻每推餘論加賁孤蹤遂叨獎擢之
榮薦冒蕃宣之寄

都正言民望頌德

此蓋伏遇某官河山稟粹金玉凝資烏臺分糾察之權
騎省振彌縫之職謀猷告于后既結異知左右惟其人
即膺巨用某敢不敷揚德意安靖封圻

賀鎮江鄭直閣作肅啟

榮升中秘來剖左符遙分東壁之光增重南徐之寄恭
惟某官器資寬博問學精深憲臺高糾察之稱卿寺著
委蛇之節久從外補殊鬱遠猷方公道之宏開宜舊人
之復用宣室之思賈誼將承前席之咨馮翊之試蕭生
尚仰本朝之志紛旗旄之載路儼輜蓋以臨民方丈蓬

山兼寓圖書之直西樓月觀更雄江海之觀某適此充
員於焉託庇鄰封在望知富燭之可分餘潤旁沾何上
流之不及其為欣幸罔罄喻言

賀辛福州次膺啟

擢從藩郡盡委連城尺籍伍符新元戎之節制油幢畫
戟增舊履之光華恭惟某官浩養積中懿文彪外早以
剛方之操揚于諫諍之聯疏屢紀於皂囊歲尚留於丹
宸仲山補袞悵：惟王道之陳佐治引裾挺：有祖風
之繼又抱江湖之興比陪簪橐之遊方觀接武於夔龍
乃復希蹤于召杜謂一圻布政未足究於遠猷故八郡

宣威庸就分於外閫事權加重眷獎彌隆惟望實之素
孚諒撫綏之有裕民之攸暨既興豈弟之謠王曰迨歸
即遙弼諧之列某傾風惟舊託庇在茲幕府宏開帳莫
陪於賓謁緘書遠致姑自竭於誠心瞻詠於中敷陳奚
究

賀閩中提舉周郎中操啟

請外抗章臨軒授節朝士嘆急流之退海邦瞻膚使之
華恭惟某官重厚有常疏通無滯素蘊淵源之學進達
休顯之時雙宇岩堯久授絳紗之業中臺親切首含錦
帳之香逮兼宰士之聯將綴從臣之籍力祈去國爰畀

乘輅北苑靈芽獨幹阜通之利南州陳粟坐收歛散之
功惟清朝正急於掄材顧雅望難稽於持橐甫濡壯轡
即返駕班某稔風散於多士之間託雲庇於鄰封之內
高山在望未降既見之心尺素可傳少叙願交之意其
如悃悃難盡名言

賀閩漕王敷文 時并啟

聯華六閣按漕七閩輟卿月於周行煥使星於劇部睿
知厚甚輿論翕然恭惟某官秀稟山河德全圭璧飭躬
以有用之學應務以不群之才曩自民墾出專軍賦足
兵足食功高細柳之屯如縵如綸寵進大農之貳將峻

躋於禁路庸詳試於外臺南國觀風益着點鞭之算西
清寓直更增攬轡之光諒玉節之方持已璽書之來下
某傾心德宇託記寶鄰未容布武於門闌敢廢將誠於
竿牘其如欣頌難盡名言

省齋別稿卷第六終



